

Die Heilige Dae:

GOD SE MEESTERPLAN



Die Heilige Dae –

GOD SE MEESTERPLAN

deur

Roderick C Meredith

Is Kersfees en Paasfees die heiligste dae van die Christelike kalender? Nee! Beslis nie op die *ware* Christelike kalender nie! Inteendeel, Christus en Sy Apostels het die Bybelse Heilige Dae onderhou wat vandag feitlik heeltemal geïgnoreer word deur die hoofstroom Christendom.

Dit is egter noodsaaklik dat ons die Ewige God gehoorsaam deur Sy Heilige Dae te onderhou, selfs in hierdie moderne tyd.

In hulle spesifieke volgorde, gee hulle die hooftrekke van die grootste plan wat ooit gemaak is – God se plan om die eindbestemming van die mensdom te bereik.

Hierdie boekie is nie te koop nie!

Dit word gratis aangebied as 'n opvoedkundige publikasie deur *Die Lewende Kerk van God*.

HDA 5.0, Januarie 2023

© 2008 *Die Lewende Kerk van God*

Alle regte voorbehou.

Gedruk in Suid-Afrika.

Skrifture in hierdie boekie is aangehaal uit die
Ou Afrikaanse Vertaling (OV, 1933)
tensy anders aangedui.
(NV, Nuwe Vertaling, 1983)

Die beklemtoning van gedeeltes van Skrifture
in hierdie boekie is dié van die uitgewer.

Vertalings uit nie-Afrikaanse geskrifte
is dié van die uitgewer.

Inhoudsopgawe

Bladsy

- 6 Inleiding – Heidense vakansiedae in teenstelling met die Heilige Dae van God
- 23 Stap 1 – Die Pasga
- 32 Stap 2 – Die Fees van Ongesuurde Brood
- 40 Stap 3 – Pinkster
- 49 Stap 4 – Die Fees van Basuine
- 57 Stap 5 – Die Versoendag
- 65 Stap 6 – Die Huttefees
- 72 Stap 7 – Die Laaste Groot Dag
- 81 Gevolgtrekking – Volg God se plan
-
-

Inleiding

Heidense vakansiedae in teenstelling met die Heilige Dae van God

Waarom onderhou so baie belydende Christene vakansiedae soos Kersfees, Paasfees en andere en *nie* die Heilige Dae wat die Bybel so duidelik voorskryf nie? Maak dit werklik saak watter dae ons vier? Beïnvloed dit ons hoop op die ewige lewe? Die antwoord is, verbasend genoeg, **Ja**. Dit maak wel saak want dit het 'n *groot invloed* op ons begrip van die **aard** en **natuur** van die God wat ons aanbid en die grootse **doel** wat Hy besig is om hier op aarde uit te werk.

Het u maar net onnadenkend **aangeneem** dat die Bybel ons leer om Kersfees en Paasfees te hou? Neem u aan dat Christus, wat vir ons die voorbeeld gestel het hoe om te leef, sowel as die oorspronklike Kerk wat Hy in die eerste eeu gestig het deur middel van Sy Apostels, Kersfees en Paasfees (Engels “*Easter*”) gevier het?

Indien u dít glo, *is u heeltemal verkeerd!*

Daar is inderdaad teoloë en geskiedskrywers wat geredelik toegee dat hierdie vakansiedae begin het as heidense feesdae en *baie jare* ná die dood van die eerste Apostels opgeneem is in die belydende Christendom! Hoe het dit gebeur? 'n Belangrike feit om in gedagte te hou, is dat die oorgrote meerderheid van die sogenaamde “Christelike” priesters en geleerdes nog **nooit** werklik 'n poging aangewend het om Jesus Christus se voorbeeld en dié van Sy eerste Apostels te volg nie! Namate die Christelike kerk in die Romeinse Ryk gegroei het, het die kerkleiers probeer om hulle godsdiens “geriefliker” te maak vir die heidene, in 'n poging om hulle te kersten en soms ook om godsdienstige vervolging te probeer voorkom.

Die gevolg is dat die ware Christelikheid eenkant toe gewerp is en 'n heidense vervalsing in die plek daarvan aanvaar is. Dié gebeure word volledig verduidelik in ons gratis boekie, *Satan se Vervalste Christendom*.

God waarsku egter ons geestelike voorvaders in antieke Israel om nie die gewoontes van die heidene in hulle omgewing aan te leer nie (Deut. 12:29-31). Jesus Christus bestraf die geestelike leiers van

Sy tyd omdat hulle menslike oorlewerings bó die Wet van God stel (Mark. 7:9).

Elkeen van ons moet dus ’n *keuse* maak. Ons moet kies tussen die viering van dae soos Kersfees en die onderhouding van die Bybelse Feesdae. Kersfees het sy oorsprong in sonaanbidding, met die heidense byvoegings soos die Joelblok (“*Yule log*”), ’n immergroen kersboom, mistelkrans (“*mistletoe*”) en Kersvader. Die Feesdae van God verduidelik stap vir stap aan ons die ontsagwekkende *plan* wat God besig is om hier op aarde uit te werk. Ons moet kies of ons Jesus Christus en Sy eerste Apostels wil volg en of ons die eiewyse priesters van die Middeleeue wil volg wat keer op keer heidense gebruike in hulle *vals* Christelikheid ingevoer het.

Die Feestyte van die HERE

Indien u op die spreekwoordelike afgeleë eiland grootgeword het, sonder enige vooropgestelde idees, met slegs die Bybel en die kalender wat die Jode vir duisende jare gebruik het, dan sou u kon vasstel dat die enigste dae wat u moes onderhou, God se Sewendedag Sabbat en Sy jaarlikse Feesdae is. Hierdie Feesdae sluit beslis nie Kersfees en Paasfees in nie, want nie een van hulle word in die Bybel genoem nie.

In een van die Engelse vertalings van die Bybel, die King James Vertaling, kom die woord “*Easter*” vir Paasfees wel voor, naamlik in Handeling 12:4. Dit is egter ’n foutiewe vertaling van die Griekse woord *Pascha* en gesaghebbende moderne Engelse vertalings gee dit korrek aan as “*Passover*”. Die korrekte Afrikaanse vertaling vir hierdie *Heilige Dag* van *God* is die Pasga. In beide die Ou en die Nuwe Afrikaanse Vertalings word die Pasga partymaal verkeerdlik aangegee as die “Paasfees”, wat dan ooreenstem met die Engelse “*Easter*” en al die Paasrituele en gebruike. Enkele kere word dit egter korrek vertaal as “Pasga”.

God het aan antieke Israel spesifieke dae gegee wat uitgesonder is as heilig en waartydens hulle Hom moes aanbid. Ons lees daarvan in Levítikus 23 waar God Moses aansê om dit aan die Israëliete te verduidelik: “Die feestyte van die HERE wat julle moet uitroep as heilige samekomste – dit is my feestyte” (vers 2). Vandag impliseer die woord “fees” dikwels ’n banket. Die *Dictionary of Word Origins* verduidelik egter dat “die idee van ‘eet’ ’n sekondêre begrip is vir *fees*, terwyl die onderliggende betekenis (soos afgelei kan word van

Die Heilige Dae – God se Meesterplan

die verwante *feesviering* en *feestelikheid*) meer te doen het met vreugde as om honger te stil” (John Ayto, 1990, bl. 222). Ons kan inderdaad “Feestyd” vervang deur “Feesviering”. Afgesien van die groot vreugde wat ervaar word, word dié Feestye van God gekenmerk deur die geestelike “voedsel” wat ons dan “eet” en “drink” – ons inname van God se Waarheid.

’n Ander belangrike feit waarop ons moet let, is dat hierdie vierings nie die feeste van die *Jode* genoem word nie, maar die “feestye van die HERE”. God noem hulle inderdaad “my feestye”. Vandag dryf baie belydende Christene egter die spot met die onderhouding van *Joodse* heilige dae met hulle vreemdklinkende name soos *Rosh Hashanah* en *Yom Kippur*. Tog sê God dat hierdie dae Sy dae is.

Baie mense sal in die “Christendom” van vandag geskok wees wanneer hulle die *identiteit* begryp van die “HERE” wat hierdie heilige tye gegee het waarin Hy aanbid moet word. Hierdie Wese, wat Israel uit Egipte en deur die Sinai woestyn gelei het, word dikwels die “Rots” genoem in die Ou Testament (Deut. 32:4; Ps. 18:3). Die apostel Paulus skryf oor Hom in die Nuwe Testament en sê dat die Israeliete “almal dieselfde geestelike drank gedrink het, want hulle het gedrink uit ’n geestelike rots wat gevolg het” (1 Kor. 10:4). Hy identifiseer Hom dan: “... en die rots was Christus.” *Jesus Christus was dus*, voordat Hy vlees geword het, die God van die Ou Testament – die “Woord” (Joh. 1:1-3, 14) wat namens God die Vader gespreek en die skeppingswerk gedoen het (Joh. 14:24; Ef. 3:9). Vir meer inligting oor hierdie onderwerp, kan u gerus skryf vir ons gratis boekie, *Die Ware God – Bewyse en Beloftes*.

Kom ons gaan terug na Levítikus 23 waar God se Feestye gelys is. Hy begin met Sy weeklikse Sabbat, wat op die “sewende dag” val (vers 3) – die periode vanaf sononder op Vrydag tot sononder op Saterdag, aangesien alle Bybelse dae bepaal word vanaf sononder tot sononder (verwys vers 32; Gen. 1:5-31). Die opdrag om die Sabbat te onderhou, is ook een van die Tien Gebooie – wat steeds ’n *vereiste* vir hedendaagse Christene is, ten spyte van baie predikante se aansprake tot die teendeel. Vir meer inligting, kan u gerus ons gratis boekies, *Watter dag is die Christelike Sabbat?* en *Die Tien Gebooie* aanvra.

God het ook nog sewe ander *jaarlikse* Feesdae behalwe hierdie *weeklikse* Feesdag wat ook in Levítikus 23 opgeteken is. In die noordelike halfgrond kom die eerste twee Feesdae in die *vroeë lente*

voor, die derde in die laatleente en die laaste vier in die herfs (verwys na die tabel “Die Hebreeuse Kalender”). Hierdie Feestye is dié wat binne die drie Feesperiodes val waarvan ons lees in Deuteronómium 16:16. Die jaarlikse Feestye wat later in meer besonderhede bespreek sal word, word só aangegee in Levítikus 23:

1. Pasga – ’n Fees wat gekenmerk is deur die offer van ’n lam, waarvan die bloed aan die deure van die Israeliete se huise in Egipte gesmeer is sodat hulle gespaar kon word toe God die eersgeborenes van die Egiptenare met die dood getref het (vers 5).

2. Die Fees van Ongesuurde Brood – ’n Fees van sewe dae wat volg op die Pasga. Enige rysmiddel, soos suurdeeg, wat brood laat rys, moes dan uit hulle woonplekke verwyder word en geen gesuurde produkte mag geëet word nie (verse 6-14).

3. Die Fees van Eerstelinge – ’n Fees wat die insameling van die eerste van die twee jaarlikse oeste gedenk. Dit is ook bekend as Pinkster (*Pentecost*) of “vyftigste”, aangesien dit presies 50 dae ná ’n spesifieke tydstip tydens die Dae van Ongesuurde Brood plaasvind (verse 15-22).

4. Die Fees van Basuine (Trompette) – ’n Dag van vreugde, onder die Jode bekend as *Rosh Hashanah*, wat gekenmerk is deur die blaas van basuine of trompette (verse 23-25).

5. Die Versoendag – ’n Plegtige geleentheid van vas en verootmoediging (verse 26-32), bekend as *Yom Kippur* by die Jode.

6. Die Huttefees – ’n Fees van sewe dae wat die insameling van die groot herfsoes simboliseer en soms ook die **Fees van Insameling** genoem word. Vir die duur van dié Fees word daar in “hutte” – dus tydelike huisvesting – gebly (verse 33-36, 42).

7. Die Agtste Dag (volg direk op die sewe dae van die Huttefees) – ’n Aparte Fees wat, gebaseer op ’n verwysing in die Nuwe Testament, bekend staan as die **Laaste Groot Dag** (verse 36-39).

Altesaam is daar dus 19 jaarlikse Feesdae (1+7+1+1+1+7+1). Sewe hiervan is spesiale rusdae of “Sabbatte”. Hierdie sewe jaarlikse Sabbatte, ook bekend as God se Heilige Dae, is die volgende:

- 1) Die Eerste Dag van Ongesuurde Brode (vers 7).
- 2) Die Laaste Dag van Ongesuurde Brode (vers 8).
- 3) Die Fees van Eerstelinge – of Pinkster (vers 21).
- 4) Die Fees van Basuine (verse 24-25).

Die Heilige Dae – God se Meesterplan

- 5) Die Versoendag (vers 27, 30-32).
- 6) Die Eerste Dag van die Huttefees (verse 35, 39).
- 7) Die Agtste Dag – of Laaste Groot Dag (verse 36, 39).

Levítikus 23 en Deuteronómium 16 is natuurlik nie die enigste plekke in die Bybel waar God se Feeste en Heilige Dae genoem word nie. Inteendeel, hierdie dae wat ons in opdrag van God moet onderhou, word dikwels in die Skrif genoem! Afgesien daarvan dat ons dwarsdeur die Ou Testament beveel word om hulle te onderhou, word hulle onderhouding deur die Christelike Kerk bevestig en bekragtig deur die feit dat Christus en die Apostels dié Heilige Dae in die *Nuwe* Testament onderhou het.

Die Hebreuse Kalender

Ons moderne Gregoriaanse Kalender word bereken deur die aarde se posisie ten opsigte van die son te bepaal terwyl die aarde een omwenteling om die son maak. Aan die ander kant gebruik die Jode altyd ’n lunisolarkalender, dit wil sê, ’n kalender wat bereken word deur die aarde se posisie ten opsigte van beide die son en die maan te bepaal. Dit is *lunêr* (maan) omdat die eerste dag van elke maand ’n “nuwe maan” is – die begin van die maan se omwenteling om die aarde. (Ons woord “maan” kom oorspronklik van die woord “maan”). Elke Hebreuse maand het dus 29 of 30 dae, wat behels dat ’n Hebreuse jaar van 12 maande korter is as die Gregoriaanse – sowat 354 dae in plaas van die 365. Om die kalender dan in lyn te bring met die solarjaar (die aarde se omwenteling om die son), word sewe uit elke 19 jaar “lunêrskrikkeljare”: ’n Ekstra maand van 29 dae word net ná die maand Adar gevoeg en Veadar of Adar II genoem (verwys na die kaart op die volgende bladsy). Dit is omtrent soos ons gebruik om elke vier jaar ’n 29e dag by Februarie te voeg, sodat die maande nie met verloop van tyd met verskillende seisoene van die jaar geassosieer word nie.

Trouens, die Jode gebruik gewoonlik twee oorvleulende kalenders – albei lunisolar. Die eerste is die *Burgerlike* (siviele) Kalender – in die Bybel die amptelike kalender van konings, geboortes en kontrakte – wat strek vanaf herfs tot herfs in die noordelike halfgrond. Hierdie kalender was algemeen in gebruik in ou Mesopotamië. Dit begin op die Fees van Basuine – die eerste dag van die maand Tishri (ook Ethanim genoem) – wat, volgens Joodse

tradisie, saamval met die sewende dag van die skeppingsweek – vandaar die rede vir hierdie herfs-tot-herfskalender. Dit is ook die rede waarom die Jode die Fees van Basuine *Rosh Hashanah* noem. Dit beteken die “hoof van die jaar” en word steeds gevier as die Joodse Nuwejaar.

God het egter aan antieke Israel ’n *ander* manier gegee om die jaar te bereken, soos ons leer uit die Israeliete se uittog uit Egipte onder Moses. In die lentemaand van Nisan of Abib, in die noordelike halfgrond, wanneer Pasga en die Fees van Ongesuurde Brood onderhou word (Ex. 12-13), sê die Here aan Moses en sy broer Aäron: “Hierdie maand moet vir julle die begin van die maande wees; dit moet vir julle die eerste van die maande van die jaar wees” (Ex. 12:2). Dié kalender, genoem die *Heilige Kalender*, gebruik dieselfde maande as die Siviële Kalender, maar begin in die lente, d.w.s. ses maande vroeër. Dit is volgens die Heilige Kalender dat ons God se Feestye onderhou. God het dit ongetwyfeld so ingestel om Sy Feestye met die landbouseisoene van die land van Israel te laat saamval, soos ons later in hierdie boekie sal sien.

Hier is die gewone maande, hulle aantal dae en wanneer hulle voorkom in God se *heilige* kalender, die Joodse *burgerlike* jaar en die *Gregoriaanse* jaar:

Huidige maande (en ou name)	Dae	Heilige maand	Burgerlike maand	Gregoriaanse maand
Nisan (Abib)	30	1e	7e	Mrt - Apr
Iyar (Ziv)	29	2e	8e	Apr - Mei
Sivan	30	3e	9e	Mei - Jun
Tammuz	29	4e	10e	Jun - Jul
Ab	30	5e	11e	Jul - Aug
Elul	29	6e	12e	Aug - Sep
Tishri (Ethanim)	30	7e	1e	Sep - Okt
Heshivan (Bul)	29/30	8e	2e	Okt - Nov
Kislev	29/30	9e	3e	Nov - Des
Tebeth	29	10e	4e	Des - Jan
Shebath	30	11e	5e	Jan - Feb
Adar	29/30	12e	6e	Feb - Mrt

Christus en die vroeë Kerk

Belydende Christene wat maar te gretig is om alles te veroordeel wat naastenby Joods is, moet onthou dat ons Saligmaker, Jesus Christus, *self 'n Jood* was (Heb. 7:14). So ook Sy eerste Apostels! Hulle het net soos ander Jode ook die Feeste van God onderhou.

'n Beskrywing van Jesus se kinderjare in Lukas sê die volgende: “En die Kindjie het gegroei en sterk geword in die Gees en vol van wysheid. En die genade van God was op Hom. EN Sy ouers was gewoond om elke jaar met die paasfees na Jerusalem te gaan” (Luk. 2:40-41). Let daarop dat die “paasfees” waarna hier verwys word, nie die paasfees was wat die Christendom vandag vier nie. Ons lees verder: “En nadat die feesdae vir hulle verby was ... het die Kind Jesus in Jerusalem agtergebly” (vers 43). Alle geleerdes stem saam dat “die feesdae” waarna hier verwys word, die Dae van Ongesuurde Brood is wat direk volg op die Pasga. Alhoewel Jesus dus “sterk was in die Gees” en in staat was om ernstige en belangrike geestelike beginsels met die belangrikste geleerdes van die Joodse Wet te bespreek, het Hy nogtans saam met Sy ouers die Fees van Ongesuurde Brood onderhou.

Gedurende Sy volwasse bediening vind ons dat Jesus *steeds* na Jerusalem gaan om God se Feeste te onderhou. Die “huttefees” het aangebreek (Joh. 7:2). Jesus sê aan Sy broers: “Gaan julle op na hierdie fees” (vers 8). Hy beveel hulle dus om *hierdie Fees te onderhou!* Jesus het *ook* na Jerusalem gegaan om dié Fees te onderhou, alhoewel in die geheim, om vervolging te vermy (vers 10). “En toe dit al in die middel van die fees was, het Jesus opgegaan na die tempel en geleer” (vers 14).

Het Jesus selfs aan die einde van Sy lewe die Feeste onderhou? Ons lees in Lukas 22:7-8: “EN die dag van die ongesuurde brode het gekom waarop die pasga geslag moes word. Toe stuur Hy Petrus en Johannes en sê: Gaan berei die pasga vir ons, dat ons dit kan eet.” Dit is presies wat gebeur het. Wat egter in die wêreld bekend is as die “Laaste Avondmaal” word in die Bybel by 'n ander naam genoem. Jesus sê aan Sy dissipels toe die tyd aanbreek: “Ek het baie sterk daarna verlang om hierdie pasga met julle te eet voordat Ek ly” (vers 15).

Natuurlik sal baie mense vandag redeneer dat die onderhouding van hierdie dae vandag nie meer op ons van toepassing is nie aangesien dit alles “voor die kruisiging” gebeur het. Tog het

Christus gedurende Sy lewe vir ons 'n voorbeeld gestel wat ons moet navolg (1 Pet. 2:21; 1 Kor. 11:1). Hiërdie voorbeeld was om die Feestyte wat Hy vroeër in die Ou Testament gegee het, *te onderhou*. Boonop is Christus op die Pasgagdag gekruisig, wat vir Christene 'n selfs groter betekenis aan hierdie dag gee. Dit is wel waar dat die diere-offers en ander veeleisende rituele van die Mosaïese stelsel nie meer bindend is op Christene nie (Hand. 15:24; Heb. 10). Dit herroep egter nie al God se Wette nie, asook nie Sy Heilige Feesdae nie. Om te verstaan wat ons behoort te doen, moet ons terugkeer na die “geloof wat eenmaal aan die heiliges oorgelewer is” (Judas 3). Waar vind ons dít? In die voorbeeld van die Christelike Kerk van die eerste Apostels, soos die Nuwe Testament ons gebied om na te volg (Hand. 16:4; 1 Thess. 2:14). Soos ons algaande sal sien, is dit verbasend om te leer wat ná die kruisiging gebeur het.

Let op wat Jesus sê aan Sy dissipels ná Sy opstanding: “En kyk, Ek stuur die belofte van my Vader op julle. Maar julle moet in die stad Jerusalem bly totdat julle toegerus is met krag uit die hoogte” (Luk. 24:49), met ander woorde, totdat hulle die Heilige Gees ontvang het. Op watter dag het hulle dit ontvang en is die begin van die Nuwe-Testamentiese Kerk ingelui? Handeling sê: “EN toe die dag van die pinksterfees aangebreek het, was hulle almal eendragtig bymekaar. En daar kom skielik uit die hemel 'n geluid soos van 'n geweldige rukwind ... En hulle is almal vervul met die Heilige Gees” (Hand. 2:1-4). Wat sou gebeur het as die dissipels God se Heilige *Dae verwerp het* en *nie* byeen was daardie dag waarop die Heilige Gees uitgestort is nie?

Sommige mense neem egter nou aan dat dit die *enigste* Pinksterdag was wat die vroeë Kerk onderhou het. Dit is egter nie waar nie! Daar is ander Skrifture wat bewys dat hierdie dag steeds onderhou was. *Paulus*, van alle mense, het inderdaad dié dag onderhou! Hy was die Apostel van die Heidene, die een wat volgens baie teoloë veronderstel was om die Wet van God af te skaf! Paulus *het egter niks van die aard* gedoen nie! Inteendeel, hy het die Wet van God *onderhou* (verwys 1 Kor. 7:19). In Handeling 20:16 lees ons: “Want Paulus het besluit om by Éfese verby te vaar, sodat hy nie in Asië tyd sou verloor nie; want hy het hom gehaas om, as dit vir hom moontlik was, op die pinksterdag in Jerusalem te wees.” Boonop het Paulus nóg 'n Pinksterdag in Éfese gehou: “Maar ek sal

Die Heilige Dae – God se Meesterplan

in Éfese bly tot Pinkster toe. Want ’n groot en kragtige deur het vir my oopgegaan, en daar is baie teëstanders” (1 Kor. 16:8-9).

Die Bybel gee talle bewyse van ander Heilige Dae wat ook deur die vroeë Kerk van die Apostels onderhou is. Handeling 27:9 sê byvoorbeeld: “En omdat ’n geruime tyd verloop het en die skeepvaart al gevaarlik geword het [vir Paulus se reisgenote] en die vastyd ook al verby was, het Paulus hulle gewaarsku”. Die vastyd was die **Versoendag**, onder die Jode bekend as *Yom Kippur*. Tydens herfs in die noordelike halfrond was seevaart gevaarlik. Wat tog so interessant is, is dat Handeling, volgens tradisie in die vroeë 60’s n.C. geskryf is deur Lukas, Paulus se medewerker. Lukas was nie “uit die besnydenis” nie – hy was nie Joods nie (verwys Kol. 4:11, 14). Hier kry ons dus ’n Heiden wat ongeveer 30 jaar ná Christus se opstanding skryf en hy dui vir ander die tyd van God se Feesdae aan!

Het u geweet dat die Nuwe Testament Christene direk *beveel* om een van God se Feestyte te onderhou? Wat Paulus skryf aan die oorwegend Heidense Kerk in Korinthe, geld ook vir ons vandag. Dit is duidelik dat Paulus die Fees van Ongesuurde Brood bedoel wanneer hy sê: “Suiwer dan die ou suurdeeg uit, sodat julle ’n nuwe deeg kan wees – soos julle inderdaad ongesuur is – want ook ons paaslam is vir ons geslag, naamlik Christus. Laat ons [Christene] dan feesvier, nie met die ou suurdeeg of met die suurdeeg van ondeug en boosheid nie, maar met die ongesuurde brode van reinheid en waarheid” (1 Kor. 5:7-8). Ons sal later wel hierheen terugkom, maar vir eers is dit genoeg om te sê dat ons die Fees van Ongesuurde Brood moet onderhou.

Historiese bewys

Die geskiedenisboeke verskaf bewyse dat die vroeë Kerk volgehou het om die Bybelse Feesdae te onderhou. Volgens die *Encyclopaedia Britannica*: “Daar is geen aanduiding in die Nuwe Testament of in die geskrifte van die eerste Apostels dat Paasfees [*Easter*] gehou is nie ... **Die eerste Christene het voortgegaan om die Joodse Feeste te hou** [GOD se Feeste] alhoewel in ’n nuwe gees, as herdenkings van gebeure wat dié Feeste uitgebeeld het. So is die Pasga, met ’n nuwe betekenis daaraan toegevoeg, nl. dié van Christus as die ware Pasgalam ... steeds gehou” (“*Easter*”, 11de uitgawe, vol. 8, bl. 828).

Ongelukkig het die afvallige Kerk van Rome egter stadig maar seker hierdie lewenswyse vervang deur die heidense gewoontes wat ons vandag sien. Die Nuwe-Testamentiese Pasga wat die vroeë Kerk aan die begin van die 14de dag van die Hebreuse maand Nisan (of Abib) gehou het, is geminag en die naam daarvan oorgedra na die heidense dag van die godin *Ishtar*, vandag bekend as “*Easter*” in Engels. Eintlik is dit net in sekere Germaanse tale dat hierdie vakansiedag die heidense naam behou het. In Grieks en in Romaanse tale soos Italiaans, Spaans en Frans, word “*Easter*” steeds Pasga genoem. In Afrikaans is Paasfees niks anders as “*Easter*” nie. Moet nie ’n fout maak nie, dié wêreldse vakansiedag was *nooit* die ware Pasga nie!

As gevolg van hierdie verwarring gebruik sommige mense die woorde Paasfees, Pasga en “*Easter*” afwisselend. Alhoewel die *Britannica* ook die fout maak, gee dit egter steeds ’n uitstekende opsomming oor hoe die dag verander is:

“Alhoewel die Christelike Kerk van die vroegste tye af al die Paasfees gehou het, ontstaan ’n ernstige geskil tussen die Christene van Joodse en dié van Heidense [nie-Joodse] afkoms oor die dag waarop dit gehou moet word en dit lei tot ’n lang en bitter geloofstryd ... **Die Joodse Christene ... onderhou dit op die 14de dag van die maan[d] in die aand ... ongeag die dag van die week.** Die Heidense Christene [gelei uit Rome] aan die ander kant ... verbind die eerste dag van die week met die opstanding en hou die

vorige Vrydag as herdenking van die kruisiging, ongeag die dag van die maand”.

Oor die algemeen het die Westelike [Rooms-Katolieke] Kerk “Easter” op die 1ste dag van die week gehou, terwyl die Oostelike Kerk [insluitend die oorblyfsels van die ware Kerk] die Joodse gebruik gevolg het.

Polycarpus, ’n dissipel van Johannes, die Evangelis [laaste van die twaalf Apostels] en biskop van Smirna, besoek Rome in 159 n.C. vir samesprekings met Anicetus, biskop van daardie bisdom, aangaande dié onderwerp. **Polycarpus lê klem op die tradisie wat hy van die Apostels ontvang het om die 14de dag te onderhou.** Anicetus wys egter die samesprekings van die hand. Omtrent veertig jaar later (197 n.C.), is die onderwerp weer bespreek deur Victor, biskop van Rome, Polycrates, aartsbiskop van die provinsie Asië, maar in ’n heeltemal ander gees. Daardie provinsie [wat kerke ingesluit het wat die apostel Paulus gestig het, soos Antiochië – al die kerke geïdentifiseer in Openbaring 2 en 3 as die ware Kerk] was die enigste deel van die Christendom wat nog vasgehou het aan die “Joodse” gebruik. Victor eis dat almal die gebruik van Rome moet aanvaar. **Polycrates weier botweg om Rome se gebruik te aanvaar en voer baie gewigtige redes aan teen Rome se gebruik.** Daarna verban Victor vir Polycrates uit die kerk, sowel as daardie Christene wat voortgaan om die [korrekte] gebruik van die Oostelike Kerk [Oos-Romeinse Ryk] te volg. Hy is egter weerhou [op advies van ander biskoppe] om die banningsbevel amptelik af te dwing ... en die kerke in Asië gaan ongestoord voort met hulle gebruik. Ons vind dat die Joodse gebruik van tyd tot tyd weer sterk na vore tree, maar dit seëvier nie in enige groot mate nie (bll. 828-829).

Let op Polycrates se verstommende brief aan Rome in antwoord op die dreigement om hom uit die kerk te ban: Op ons beurt onderhou ons die dag [Pasga] nougeset, sonder om iets by te voeg of weg te neem, want in Asië het groot geeste gesterf wat weer sal opstaan op die dag van die Here se koms, wanneer Hy in heerlikheid uit die hemel sal kom en al Sy heiliges sal opsoek – soos Filippus ... [die apostel] Johannes ... Polycarpus ... Sagaris ... Papirius ... Melito. **Hulle almal het die veertiende dag van die maand onderhou as die begin van die Pasgafees, volgens die Evangelie, sonder om in die geringste mate af te wyk, slegs volgens die reël van die geloof.** Laastens het ook ek, die geringste van julle almal, gehandel volgens

die tradisie van my familie ... want sewe van hulle was biskoppe en ek is die agtste en **my familie het altyd die dag gehou wanneer die mense die suurdeeg uitsit**. Ek, my vriende, nadat ek 65 jaar in die diens van die Here gestaan het, met Christene van oor die hele wêreld gepraat het, sorgvuldig die Heilige Skrif ondersoek het, is nie bang vir dreigemente nie. Beter mense as ek het gesê [aanhaling uit Hand. 5:29]: “Ons moet aan God meer gehoorsaam wees as aan die mense” [soos aangehaal deur Eusebius, *The History of the Church*, boek 5, hoofstuk 24, vertaal deur G.A. Williamson, 1965, bl. 231].

Die *Britannica* verduidelik dan hoe viering van “*Easter*” die “ortodokse” gebruik geword het:

“Die finale bylegging van die geskil was een van die redes waarom [Romeinse Keiser] Konstantyn die Raad van Nicea in 325 byeengeroep het. Op daardie tydstip was die Siriërs en die Antiochiërs die enigstes wat die 14de dag onderhou het. Die Raad was eenparig dat ‘*Easter*’ op Sondag gehou moes word en op dieselfde Sondag dwarsdeur die wêreld en dat ‘niemand hierna die blindheid van die Jode moet volg nie’. Die HANDJIEVOL wat hulleself daarna afgesonder het van die [polities invloedryke] kerk en voortgegaan het om die 14de dag te hou, is die ‘Quartodecimani’ genoem [van die Latynse woord vir 14] en die geskil staan bekend as die ‘Quartodecimaanse geskil’” (bl. 828-829).

Dit was die “handjievool” wat getrou gebly het aan die waarheid.

Vir alle nasies

’n Kragtige profesie oor die eindtyd en die begin van ’n nuwe wêreld stel dit baie duidelik dat *alle* nasies spoedig sal leer om God se Feestye te onderhou, veral die Huttefees! Die boek van Sagaría gee die besonderhede van Jesus Christus se Wederkoms in krag en heerlikheid (Sag. 14:4). Op daardie tydstip sal Christus Sy troon in Jerusalem vestig en begin regeer oor alle nasies op aarde (Jes. 2:2-4; Jer. 3:17). Sagaría sê verder: “En almal wat oorbly uit al die nasies wat teen Jerusalem aangekom het, sal jaar na jaar optrek om te

Die Heilige Dae – God se Meesterplan

aanbid voor die Koning, die HERE van die leërskaar, en om die huttefees te vier” (14:16). Die profesie sê selfs dat diegene wat hierdie opdrag verontagsaam, gestraf sal word (verse 17-19).

Dit is duidelik dat God in die verre verlede verwag het dat Sy mense Sy Feeste sou onderhou. Dit is ook duidelik dat Hy in die toekoms van alle nasies sal verwag dat hulle ook dié Feestye sal onderhou. Dink u nie dit maak sin dat ons hulle *vandag* moet onderhou nie? Die vroeë Christelike Kerk het so gedink. Dink ’n bietjie daarvoor na. Aangesien *elke* mens op aarde spoedig sal leer om die Heilige Dae te onderhou, waarom begin *u* nie *nou* om hulle te onderhou nie? Waarom word u nie ’n geestelike “pionier” en baan die weg vir die *biljoene* mense wat ná Christus se Wederkoms tot hierdie insig sal kom nie?

Natuurlik sal sommige mense steeds beswaar maak op grond daarvan dat hierdie dae *Joods* is. Ons het reeds gesien dat *alle* nasies binnekort sal leer om die Bybelse Heilige Dae te onderhou, NIE omdat hulle “Joods” is nie, maar omdat God *al* Sy mense beveel om dié dae te onderhou. Soos ons ook reeds gesien het, het Jesus Christus en die Kerk wat Hy in die eerste eeu gevestig het, dié dae onderhou – dit is die voorbeeld wat ons moet navolg.

Miskien moet ons twee keer dink om iets te verwerp bloot omdat dit *Joods* is. Per slot van sake was Jesus self ’n Jood! Let op wat Hy aan die Samaritaanse vrou, wat nie ’n Jood was nie, sê: “Julle aanbid wat julle nie weet nie; ons aanbid wat ons weet, want die saligheid is uit die Jode” (Joh. 4:22).

Alhoewel die Jode dikwels Sy leerstellings verwerp het of dit vervang het met allerhande menslike tradisies, het hulle wel die kennis van God die Skepper bewaar, sowel as die enigste geskrewe Bybel wat aan die oorspronklike Nuwe-Testamentiese Christene beskikbaar was – vandag is daardie Bybel bekend as die Ou Testament. Deur Jesus – die beloofde Saligmaker wat uit die Jode gebore is – het die regte begrip van die Ou Testament gekom: dus is die saligheid “uit die Jode” (verwys Rom. 3:1-2; 2 Tim. 3:15). Ten spyte van menslike swakhede en mensgemaakte tradisies, het die Jode wel die geestelike *Wet* van God, die Tien Gebooe, bewaar. Die vierde van hierdie Gebooe is om die ware weeklikse Sabbat te onderhou – in die gees van hierdie gebod, dus ook die jaarlikse Sabbatte. Boonop wys Paulus dat alle ware Christene *geestelike* Jode is (verwys Rom. 2:28-29; Gal. 6:15-16). As geestelike Jode word van ons vereis dat ons die geestelike Wette en die Heilige Dae

sal onderhou wat God aan Israel gegee het en bevestig is deur Christus se voorbeeld asook dié van die geïnspireerde Nuwe-Testamentiese Kerk.

Die plan van God

Christene moet die dae wat God *geheilig het* ook *heilig*, volgens die voorbeeld van Christus en Sy oorspronklike Apostels. Daardeur sal ons verstand geopen word om te verstaan wat die *plan* en *doel* is wat God besig is om hier op aarde uit te werk.

Die Skepper van die heelal het inderdaad 'n grootse plan vir die hele mensdom. Let op wat Paulus aan die gemeente in Efése skryf: "... deurdat Hy aan ons die verborgenheid van sy wil bekend gemaak het na sy welbehag wat Hy in Homself voorgeneem het, om die volheid van die tye te reël, met die doel om alle dinge wat in die hemele sowel as wat op die aarde is, onder een hoof in Christus te verenig – in Hom in wie ons ook 'n erfdeel ontvang het nadat ons vantevore daartoe verordineer is ooreenkomstig die voorneme van Hom wat alles werk volgens die raad van sy wil" (Ef. 1:9-11).

In dieselfde brief verduidelik Paulus wat die doel van sy bediening was: "Ek moet aan almal bekend maak hoe God, die Skepper van alle dinge, nou sy verborge plan uitvoer nadat Hy dit deur al die eeue geheim laat bly het ... soos Hy Hom van ewigheid af al voorgeneem het om dit deur Christus Jesus, ons Here, tot uitvoering te bring" (Ef. 3:9-11, NV).

Die meeste mense is egter onbewus van God se plan. Waarom? Volgens u Bybel is daar 'n werklike bose gees wat die heerser is van hierdie teenwoordige wêreld. Hy het voorheen teen God in opstand gekom (verwys Jes. 14) en sy naam is Satan, wat "teenstander" beteken. Hierdie bose wese, wat ook bekend is as die duiwel, **verlei die hele wêreld** (Op. 12:9). "Verlei" kan hier ook "mislei" beteken. Paulus verduidelik: "Maar as ons evangelie dan nog bedek is, is dit bedek in die wat verlore gaan, *naamlik* die ongelowiges in wie die god van hierdie wêreld [dit is Satan] die sinne verblind het" (2 Kor. 4:3-4).

Een van die maniere waarop Satan hierdie wêreld verblind het, is deur vervalsing in te stel en die fokus van die ware Feestye van God te verbloem. Die Christelike heilige dae is deur God ingestel, omdat God se meesterplan deur middel van hierdie Feestye duidelik

gemaak word. Kom ons kyk hoe die God wat later Jesus Christus geword het hierdie Feestye bekend stel: “Dit is die feestye van die HERE, die heilige vierdae [samekomste] wat julle moet uitroep op hulle bepaalde tyd” (Lev. 23:4). Interessant genoeg is die Hebreeuse woord wat as “Feestye” vertaal word dieselfde as die woord vir “bepaalde tyd”, naamlik *mo`ed*. Volgens die *Enhanced Strong’s Lexicon* beteken hierdie woord “bepaalde plek, bepaalde tyd, byeenkoms”. **Die Feestye is dus God se geskeduleerde afspraak om Sy mense te ontmoet.** Vir ons beteken dit: Merk dit af op u almanak en sorg dat u *daar is!*

Wat is die doel met ’n samekoms of vergadering? Dit is gewoonlik om ’n saak te bespreek, iets te hersien of ’n aksieplan vir ’n belangrike saak in werking te stel. Ons moet ook let op die ander woord wat gebruik word in verband met die Feestye, naamlik “vierdae”. Dit beteken verpligte samekomste – God beveel ons om die afspraak met Hom na te kom. Op sodanige dae kom ons dus byeen en ons aanbid God. Daar steek egter iets meer in ’n vierdag (OV), ’n samekoms (OV) of ’n gewyde byeenkoms, (NV). Die Hebreeuse woord *miqra* – vir “vierdag” – kan ook ’n “voorlesing” of “repetisie” beteken (“*Lexical Aids*”, no. 4744, *The Complete Word Study Old Testament*).

Die verstommende gevolgtrekking is dat **die Feestye dié tye is wat deur God geskeduleer is vir ’n afspraak met die mensdom om die ongelooflike stappe van Sy ontsagwekkende plan van verlossing te vervul.** Elke jaar moet ons op hierdie dae byeenkom om dié belangrike stappe te herhaal en “in te oefen” – deur herhaling word die plan in ons verstand gevestig en verdiep ons begrip van die ware betekenis.

Ongelukkig weet die moderne Christendom byna niks van die plan waarmee God besig is nie aangesien hulle net een aspek van God se plan so op ’n manier onderhou. U sien, die meerderheid belydende Christene neem wel die brood en wyn om Christus se offer te gedenk – hulle noem dit die Nagmaal of die Avondmaal. Hulle *verstaan egter nie* die volle betekenis van Christus se offer soos wat dit deur hierdie simbole verteenwoordig word nie. Buitendien verteenwoordig die brood en die wyn slegs die **eerste stap** in God se plan.

Ons kan tog nie ophou by die eerste stap nie. God het ’n plan van *sewe* stappe. Inderdaad, baie van die dinge wat God doen, word geopenbaar in ’n patroon van *sewe*. In die begin skep Hy ’n *sewedag*

week en heilig die *sewende* dag as Sy Sabbat (Gen. 2:1-3; Ex. 20:11). Later, soos ons al gesien het, gee Hy presies *sewe* jaarlikse Heilige Dae in *sewe* Feestye om Sy algehele plan en doel met die mensdom bekend te maak. In die Nuwe Testament, in Openbaring, vind ons die *sewe* Gemeentes, die *sewe* seëls, die *sewe* basuine of trompette en *sewe* laaste plae. Die getal *sewe*, soos baie Bybelkenners erken, word in die Skrif gebruik om voltooiing of perfeksie te simboliseer. Met dié kennis is dit onverstaanbaar om net *een* van die jaarlikse Heilige Dae te onderhou en al die ander in God se plan weg te laat!

Wil u werklik God se plan ten volle verstaan? Soek Hom dan heelhartig in gebed en Bybelstudie: “Dan sal julle daarvandaan die HERE jou God soek en vind as jy Hom met jou hele hart en jou hele siel soek” (Deut. 4:29). Wanneer u Hom vind, **gehoorsaam** Hom dan deur die presiese dae te onderhou wat Hy gegee het juis om ons hiermee te help, die weeklikse en jaarlikse Sabbatte! Soos koning Dawid skryf: “Wysheid begin met die dien van die Here; almal wat dit doen, het ware insig” (Ps. 111:10, NV). Om die Here te dien, beteken om Hom te gehoorsaam. Indien u werklik wil weet *waarom* God u aansê om iets te doen, begin dit doen en u sal spoedig die rede daarvoor uitvind!

Laat ons nou die doel en betekenis van elk van God se *sewe* godsdienstige Feestye bestudeer en *ten volle verstaan* wat die betekenis en doel is van elk van daardie *sewe* godsdienstige Feestye wat God aan die mensdom gegee het om te onderhou. Onthou nou, deur hierdie Feestye te verstaan en te onderhou, bly die grootse **meesterplan** van ons Skepper altyd in ons gedagte.

Galásiërs 4:10

In Galásiërs 4 skryf die apostel Paulus: “... hoe val julle dan nou weer terug na daardie minderwaardige en armsalige wettiese godsdienstige reëls? Wil julle van voor af weer slawe daarvan wees? Julle hou aan om besondere dae en maande, feesgeleenthede en jare te vier” (verse 9-10, NV).

Vandag redeneer baie mense dat Paulus hier die Joodse Feestye aanval. Paulus sou egter nie God se Feestye “swak en armoedig” (OV) noem nie. ’n Eietydse publikasie verklaar dat die konteks van Galásiërs 4:10 “verstaan moet word as ’n *heidense* wêreldse plan” (Troy Martin, *New Testament Studies, an International Journal*, Jan. 1996, bl. 113). Die ontvangers van Paulus se brief was hoofsaaklik *bekeerde Heidene*. Hulle het voor hulle bekering dus *nooit* God se Heilige Dae onderhou nie. Indien Paulus dus na God se Heilige Dae sou verwys, maak dit glad nie sin in dié konteks nie.

Waarom dink so baie mense dan dat Paulus verwys na die Feestye wat die Jode onderhou het? Omdat die hele eerste gedeelte van Galásiërs gaan oor die verwerping van ’n wyd verspreide dwaalleer wat sommige Christene van Joodse afkoms verkondig het. Handeling 15 bewys dat sommige van die Joodse Christene verkondig het dat nie-Joodse bekeerlinge besny moes word en die seremoniële wet van Moses moes hou om gered te kon word. Paulus begin Galásiërs 4 deur te verwys na “ons”, die Jode, wat slawe was van ’n wettiese godsdienststelsel wat nodig was vanweë hulle gesamentlike ongehoorsaamheid.

Hy verander dan die fokus na “julle”, die Heidene, wat God voorheen “nie geken het nie” en “nikswerd afgode” gedien het (vers 8, NV). Party van *hulle* het nou teruggekeer na heidense gebruike. Waarom? Alhoewel die boodskap wel vir sommige sin gemaak het, verduidelik die Cambridge publikasie dat dié “verjoodse” boodskap baie mense egter van die Christendom weggedryf het, terug na hulle heidense gewoontes van tevore, weens ’n vrees vir die besnydenis.

Indien Paulus wel na God se Feestye of Sabbatte verwys het, sou hy gewis die presiese terme en name gebruik het (verwys Kol. 2:16). Hierdie gedeelte in Galásiërs beteken dus nie dat God se Heilige Dae geïgnoreer moet word nie. Trouens, dit handel nie eens oor die Heilige Dae nie!

Stap 1

Die Pasga

Vêr, vêr in die verlede, miskien selfs voordat tyd bestaan het, het die Ewige God besluit om wesens te skape wat eendag Sy ware seuns en dogters sou word. Wesens soos Hyself, wat, in 'n sekere sin, “uit Homself sou voortkom”, wat Sy goddelike natuur sou hê (2 Pet. 1:4), Sy regverdigse **karakter** wat in hulle gevestig sou word deur Sy Heilige Gees.

Wat is God se karakter? Die Bybel verklaar: “God is liefde” (1 Joh. 4:8). Ware liefde is uitgaande besorgdheid vir ander. Hierdie oorheersende beginsel is die basis vir God se lewenswyse, vir Sy ewige geestelike gedragskode, naamlik Sy Wet. God se lewenswyse behels gee en dien, deel en hulp verleen, saam werk en vrede maak. Dit is alles wat reg en goed is.

Daar is natuurlik ook 'n *ander* lewenswyse, die *bose* lewenswyse. Dié lewenswyse is die teenoorgestelde van God se karakter en fokus op die eie ek. Dit gaan oor selfverheerliking, oor persoonlike voordeel trek – met ander woorde, *ontvang* in plaas van *gee*. Hierdie wet van eiewaan *belowe* eer aan die aanhangers daarvan, maar in werklikheid lei dit uiteindelik tot wedywing, tweedrag, lyding en hartseer.

Heilige, regverdigse karakter is die vermoë van 'n denkende wese met vryheid van keuse om gewillig die regte weg te kies – God se weg. Die engele, magtige geestelike wesens geskape deur God, het ook hierdie vrye keuse gehad. Ongelukkig het een derde van hulle – simbolies “sterre” genoem (verwys Op. 1:20) – onder Satan se invloed besluit om die bose weg te kies (Op. 12:4). Omdat die wederstrewige net onheil soek (Spr. 17:11), is dit nie vreemd dat hulle teen God gerebelleer het en Sy Heilige Wet van liefde oortree het nie. Sodoende het hierdie engele gesondig, want “Sonde is immers oortreding van die wet van God” (1 Joh. 3:4, NV). Hulle het selfs 'n aanval teen die hemel geloods en teen die oorblywende, lojale twee derdes van die engele geveg. Die opstandige engele – nou bekend as demone of bose geeste – is na die aarde neergewerp, wat tot vandag toe hulle “geestelike tronk” is.

In 'n latere tydvak, word dit toe tyd dat God begin om Sy eie, letterlike geestelike kinders te skape. Hulle sou aanvanklik *nie* geskape word as magtige geestelike wesens soos die engele nie,

Die Heilige Dae – God se Meesterplan

want voordat Hy hulle gees sou maak, sou God hulle eers as *fisiese* wesens, as *menslike* wesens skape. Hulle sou Sy vorm en gedaante hê asook *sekere* goddelike vermoëns – soos verstand om te redeneer en verbeelding om te kan skep. Hulle sou vlees en bloed wees, onderworpe aan fisieke verval en aftakeling en selfs die dood. Deurdad hulle vryheid van keuse het om te besluit tussen goed en kwaad, sou hulle tydens hulle stoflike menseleuens *moes bewys* dat hulle *God se weg* sou kies, bereid is om hulle wil aan God te onderwerp, Hom te dien en *nooit* teen Hom sal draai soos die opstandige engele nie. Wanneer mense wel teen God sou rebelleer en sondig, dan sou hulle die boete moes betaal wat God bepaal het – soos Hy ons leer deur Paulus se woorde: “... die loon van die sonde is die dood” (Rom. 6:23).

Adam en Eva, die eerste menslike wesens, het inderdaad gesondig – weens die leuens en versoekings van Satan. Ten spyte van die feit dat God Sy geestelike Wet, die Tien Gebooie, in gekodifiseerde vorm aan die mensdom gegee het, het elke mens – behalwe slegs Jesus Christus – sedertdien gesondig: “... want almal het gesondig en dit ontbreek hulle aan die heerlijkheid van God” (Rom. 3:23) en “die dood tot alle mense deurgedring het, omdat almal gesondig het” (Rom. 5:12). Is daar dan geen hoop nie? Is totale uitwissing dan onafwendbaar? Glad nie! U sien, die Alwetende en Almagtige God het voorsiening gemaak vir so ’n moontlikheid. Die Almagtige laat in Sy alwysheid inderdaad toe dat die mensdom tot sonde gelei word deur Satan. Hy *laat dit toe* dat die mens deur sy ganse geskiedenis sy *eie* paadjie loop, om op die harde manier te leer waarheen sonde hom sou lei. Vandag leer die mens steeds die lesse van die lewe deur sy *eie* menslike ondervinding en lyding – maar die meeste mense *leer nie* werklik iets uit daardie lesse nie. Uiteindelik sal *elkeen* egter die geleentheid hê om werklik die regte weg te leer ken en dit na behore te lewe.

Verlossing word moontlik gemaak

Hoe sou God die mensdom dan met Homself versoen? Selfs al sou mense die een of ander tyd in hulle lewe berou hê oor hulle bese wêre en hulle tot God keer en Hom begin gehoorsaam, sou hulle *steeds* onder die doodsvonnis wees as gevolg van hulle *vorige* sondes. Weereens, hoe kan ons versoen raak met God? Die antwoord is God se plan van verlossing! Sondaars – en dis *almal*

van ons – sou verlos word, “teruggekoop” word. Die prys is uiteraard geweldig hoog, want die verlossingsbedrag moes groter wees as die waarde van alle mense. Wat kan dan meer waarde hê as die totaal van alle menseleuens deur die eeue? Die lewe van daardie God wat ons geskape het. Onthou, dat die Vader “alles geskape het deur Jesus Christus” (Ef. 3:9; verwys Joh. 1:1-3; Kol. 1:18).

Dis verstommend, maar Hulle het besluit om die uiterste offer te bring en die hoogste prys ooit te betaal: “... maar ons sien Hom ... Jesus, wat vir ’n kort tydjie minder as die engele gemaak is ... sodat Hy deur die genade van God vir elkeen die dood sou smaak. Want dit het Hom betaam [om hierdie prys te betaal], ter wille van wie alle dinge en deur wie alle dinge is” (Heb. 2:9-10). Jesus Christus was die Een wat in ons plek sou sterf.

Dit was ’n ontsaglike offer. Die Vader het die Wese naaste aan Hom in die heelal, afgestaan sodat ons gered kon word. “Want”, sê die Goue Vers: “... so lief het God die wêreld gehad, dat Hy sy eniggebore Seun gegee het, sodat elkeen wat in Hom glo, nie verlore mag gaan nie, maar die ewige lewe kan hê” (Joh. 3:16).

Ter wille van ons, het die Wese wat later Jesus Christus sou word, dus Sy onbeskryflike heerlikheid prysgegee: “Hy, wat in die gestalte van God was, het dit geen roof geag om aan God gelyk te wees nie, maar het Homself ontledig deur die gestalte van ’n dienskneg aan te neem en aan die mense gelyk geword; en in gedaante gevind as ’n mens, het Hy Homself verneder deur gehoorsaam te word tot die dood toe, ja, die dood van die kruis” (Fil. 2:6-8).

Hierdie ontsagwekkende gebeurtenis is van die begin af beplan. In Openbaring 13:8 word Christus beskryf as “die Lam wat geslag is van die grondlegging van die wêreld af”. Johannes die Doper noem Hom “die Lam van God wat die sonde van die wêreld wegneem!” (Joh. 1:29). Waarom word Christus só genoem? Die Ou Testament gee die antwoord.

In die tyd van Moses, weke *voordat* die Israelite by die berg Sinai aankom en dus *voor* die “Ou Verbond” met hulle gesluit is, beveel die Here dat elke huisgesin ’n “lam”, naamlik ’n bok- of skaaprammetjie sonder gebrek, in bewaring moes hou (Ex. 12:3-5). Hierdie dier moes op die aand van 14 Nisan – die Pasgafees – geslag word (vers 6; verwys Lev. 23:5).

God het beplan om daardie nag AL die eersgeborenes in Egipte uit te wis omdat Farao Sy volk nie wou laat trek nie. Hy sê aan die

Die Heilige Dae – God se Meesterplan

Israëliete dat as hulle Hom sou gehoorsaam deur die Pasgalam te slag en te eet en van die bloed aan die deurposte te smeer, dan “as Ek die bloed sien, sal Ek by julle verbygaan. En daar sal geen verderflike plaag onder julle wees wanneer Ek Egipteland tref nie” (Ex. 12:13). In Engels word dit die “*Passover*” genoem na aanleiding van God se belofte: “*I will pass over you*”. Dan vervolg God: “En hierdie dag moet vir julle ’n gedenktag wees, en julle moet dit as ’n fees tot eer van die HERE vier. Julle moet dit in julle geslagte as ’n ewige insetting vier” (Ex. 12:14). Eintlik hoef ons nie verder as hierdie vers te gaan om te verstaan dat ons Jesus Christus, ons Verlosser, se offerande op hierdie spesifieke dag moet herdenk nie – en nie sommer net op enige dag wat ons sou pas nie.

Christus ons Pasgalam

Dit is duidelik dat die slag van die Pasgalam Jesus Christus se offerande *simboliseer*. Ons het al gesien dat Paulus skryf: “... want ook ons paaslam [Pasgalam] is vir ons geslag, naamlik Christus” (1 Kor. 5:7). Dus, byna 1,500 jaar vóór die tyd, lei God ’n *hele nasie* van omtrent 3 miljoen mense om die ongelooflike *offerande* wat Sy eie Seun, Jesus Christus, later vir die hele mensdom sou bring, in simboliek uit te beeld.

Dit is Jesus Christus se dood wat versoening bring vir die gruwel van sonde. Elke mens wat hierdie versoening aanneem, kan vrygekoop of teruggekoop word. Die Pasga versinnebeeld die feit dat ons “en hulle ... deur sy genade sonder verdienste geregverdig [word] deur die verlossing wat in Christus Jesus is. Hom het God voorgestel in sy bloed as ’n versoening deur die geloof, om sy geregtigheid te bewys deurdat Hy die sondes ongestraf laat bly het wat tevore gedoen is onder die verdraagsaamheid van God” (Rom. 3:24-25).

Ons moet ook daarop wys dat Jesus Christus dít wat die Pasgafees simboliseer, verder vervul het deurdat Hy op daardie dag gekruisig is! Onthou dat die laaste maaltyd wat Jesus Christus as ’n mens geëet het die Ou-Testamentiese Pasga was – dit was die aand, die aanvang van 14 Nisan. Onthou ook dat die Bybelse en Hebreeuse dae begin met *sonsondergang*. Let ook op die volgende feite: Jesus noem dié ete die Pasga: “... hierdie pasga met julle te eet voordat Ek ly” (Luk. 22:15). Vroeër sê Hy Sy dissipels aan om aan die man in wie se huis hulle die Pasga sou eet, te sê: “Die Meester laat weet:

My tyd is naby. By jou sal Ek die pasga hou met My dissipels” (Matt. 26:18). Die volgende namiddag, toe Christus werklik sterf, was dit natuurlik nog *steeds* die 14e dag van Nisan en dus *steeds* die Pasga!

Wat van vandag? Noudat diere-offers in onbruik is (Heb. 10), hoe behoort Christene hierdie Fees te onderhou? Christus gee die antwoord. Tydens Sy laaste Pasgamaal stel Hy die seremonie van die voetewas in (Joh. 13:1-7) om ons te leer om mekaar te dien en nederig te wees. Hy neem dan twee items wat tradisioneel deel was van die aandete – brood en wyn – en beveel Sy dissipels om daaraan deel te hê as simbool van Sy offer aan die mensdom (Matt. 26:26-29).

Elke ware Christen behoort dieselfde seremonie te onderhou. Dit moet *een maal* per jaar, soos God beveel, onderhou word en op dieselfde aand dat Jesus oorgelewer was om gekruisig te word. Die apostel Paulus verduidelik: “Want ek het van die Here ontvang wat ek ook aan julle oorgelewer het, dat die Here Jesus in die nag waarin Hy verraai is, brood geneem het; en nadat Hy gedank het, het Hy dit gebreek en gesê: Neem, eet; dit is my liggaam wat vir julle gebreek word; doen dit tot my gedagtenis. Net so ook die beker ná die ete, met die woorde: Hierdie beker is die nuwe testament in my bloed; doen dit, so dikwels as julle daaruit drink, tot my gedagtenis. Want so dikwels as julle hierdie brood eet en hierdie beker drink [dit is een maal per jaar tydens die Pasga], verkondig julle die dood van die Here totdat Hy kom” (1 Kor. 11:23-26).

Ons moet dus nie meer ’n lamoffer en die volle Pasgamaal eet nie (verse 20, 34), want die brood en die wyn simboliseer nou Christus se gebreekte liggaam en Sy gestorte bloed. Vroeër het ons Verlosser hierna verwys met die woorde: “Ek is die lewende brood wat uit die hemel neergedaal het. As iemand van hierdie brood eet, sal hy lewe *tot* in ewigheid. En die brood wat Ek sal gee, is my vlees wat Ek vir die lewe van die wêreld sal gee ... Voorwaar, voorwaar Ek sê vir julle, as julle nie die vlees van die Seun van die mens eet en sy bloed drink nie, het julle geen lewe in julleself nie. Hy wat my vlees eet en my bloed drink, het die ewige lewe, en Ek sal hom opwek in die laaste dag. Want my vlees is waarlik spys, en my bloed is waarlik drank. Wie my vlees eet en my bloed drink, bly in My en Ek in hom” (Joh. 6:51-56).

Alhoewel daar groot geestelike waarheid steek in wat Christus hier sê, is die Pasgasimbole inderdaad daarby ingesluit. Dit moet

Die Heilige Dae – God se Meesterplan

beklemtoon word dat die brood en wyn *slegs* simbole is. Dit word *nie*, soos die Rooms-Katolieke leer, “verander” in die *letterlike* liggaam en bloed van Jesus nie – wat dán immers beteken dat Jesus keer op keer sterf elke keer dat daardie seremonie gehou word! Die boek aan die Hebreërs stel dit baie duidelik dat Christus een keer en net één keer, as ’n vlees-en-bloed offerande geoffer is (Heb. 7:26-27; 9:25-28; 10:10-14).

Wat stel hierdie simbole dan voor?

Die gebreekte brood

Die brood – *ongesuurde* boord, want dit was die enigste brood wat met die Pasga toegelaat is (verwys Ex. 12:8) – verteenwoordig die liggaam van Christus wat sonder sonde is, wat vir ons “gebreek” is (1 Kor. 11:24). God se Woord toon uitdruklik dat Jesus verskriklik gely het net voor Sy kruisiging toe Hy gemartel en geysel is. Geskiedkundiges sê dat die Romeinse geseling bestaan het uit houe met ’n leersweep waarin skerp stukkie metaal vasgemaak is om vel te sny en te skeur. Eintlik het baie van die veroordeelde misdadigers gesterf voor hulle kruisiging, weens die trauma en gevolglike bloedverlies van só ’n geseling.

Waarom moes Jesus hierdie afgryslike geseling verduur?

Omtrent 700 jaar voor dié gebeurtenis, inspireer God die profeet Jesaja om die Messias se laaste oomblikke asook die doel daarvan, te beskryf. “Nogtans het Hy ons krankhede op Hom geneem, en ons smarte – dié het Hy gedra; maar ons het Hom gehou vir een wat geplaag, deur God geslaan en verdruk was. Maar Hy is ter wille van ons oortreding deurboor, ter wille van ons ongeregtighede is Hy verbrysel; die straf wat vir ons die vrede aanbring, was op Hom, en deur sy wonde het daar vir ons genesing gekom” (Jes. 53:4-5).

On gelooflik! Omdat ons Verlosser daardie fisiese marteling verduur het, kan ons gesond gemaak word as ons siek is of beseer is! Kyk ook hoe die sin “Hy het ons krankhede op Hom geneem, en ons siektes gedra” in die Nuwe Testament aangegee word. Die apostel Matthéüs skryf hoe Jesus baie mense gesond gemaak het en haal dan hierdie vers aan as die vervulling van Jesaja se profesie: “Hy het die geeste met ’n woord uitgedrywe; en almal wat ongesteld was, het Hy gesond gemaak, sodat vervul sou word wat gespreek is deur Jesaja, die profeet, toe hy gesê het: Hy het ons krankhede op Hom geneem en ons siektes gedra” (Matt. 8:16-17).

Hoe kan dit dan wees? Afgesien van die uiteindelijke loon van die sonde – die ewige dood – het sonde ook nog verskriklike gevolge vir die mens in hierdie lewe. Dit bring allerhande lyding, hetsy geestelik, siele-angs, emosioneel of fisies. Siekte is op die ou einde die gevolg van sonde – óf dis iets wat ons self gedoen het of iets wat iemand anders gedoen of nie gedoen het nie, óf bloot weens die feit dat siektes en siektetoestande die wêreld binnegekom het omdat die mensdom van God afgesny is sedert Adam en Eva gesondig het.

Hoe wonderlik om te weet dat Christus die finale *doodsvonnis* vir sonde om ons onthalwe betaal het. Hy het ook betaal vir die *ander* gevolge van sonde – soos lyding, pyn en hartseer – deur die verskriklike geselhoue en marteling wat Hy verduur het. Dit beteken egter nie dat God in ons huidige leeftyd *al* die gevolge van ons sondes van die verlede sal verwyder nie. Hy kan verkies om dit *nie* te doen nie sodat ons lesse daaruit kan leer (verwys 2 Sam. 12:7-23). Ons kan nogtans dankbaar wees dat ons, weens Christus se offerande, dikwels in hierdie lewe genade sal ontvang. Van groter belang, ons wéét dat as ons kinders van die Lewende God is en Sy Heilige Gees in ons het, dan sál ons die *uiteindelike* vonnis vir sonde, die ewige dood, vryspring. Eendag sal *alle* gevolge van sonde verwyder word van die hele mensdom, omdat die mensdom dan volkome gehoorsaam sal wees aan God (verwys Op. 21:4).

Vir eers is dit egter belangrik dat ons verstaan dat die genesing van ons liggame moontlik is weens Jesus Christus se gebreekte liggaam. Hy het daardie verskriklike geseling ondergaan, toe Hy in Homself die pyn en ellende gedra het wat siektes en beserings meebring. Die apostel Petrus haal Jesaja aan: “... wat self ons sondes in sy liggaam op die kruishout gedra het, sodat ons die sondes kan afsterwe en vir die geregtigheid lewe; deur wie se wonde julle genes is” (1 Pet. 2:24).

Vandag egter, weet die grootste aantal belydende Christene hoegenaamd *nie* dat die gebreekte brood van die Pasga Christus se gebreekte liggaam simboliseer nie! Die vroeë Kerk in Korinthe het hierdie bemoedigende feit selfs vergeet. Paulus waarsku die Christene in Korinthe dat hulle die liggaam van die Here nie na behore onderskei nie: “Maar die mens moet homself beproef en só van die brood eet en uit die beker drink. Want wie op onwaardige wyse eet en drink, eet en drink ’n oordeel oor homself, terwyl hy die liggaam van die Here nie onderskei nie. Daarom is daar onder julle

Die Heilige Dae – God se Meesterplan

baie swakkes en sieklikes, en ’n aantal het ontslaap [het gesterf]” (1 Kor. 11:28-30).

Mag God ons almal help met die besef dat wanneer ons tydens die Pasga die ongesuurde brood eet, ons herbevestig dat ons Christus se gebreekte liggaam aanvaar as betaling vir die straf wat ons sonde oor ons bring in hierdie lewe – en veral die fisiese straf van siektes en swakhede.

Die wyn

Nadat die dissipels van die ongesuurde brood geneem het, stel Christus die volgende deel van die Pasgaseremonie in: “Toe neem Hy die beker, en nadat Hy gedank het, gee Hy dit aan hulle en sê: Drink almal daaruit. Want dit is my bloed, die bloed van die nuwe testament [verbond], wat vir baie uitgestort word tot vergifnis van sondes” (Matt. 26:27-28). Die drank wat hier gebruik was, was wyn, die “vrug van die wynstok” (vers 29). In hierdie seremonie simboliseer rooi wyn die gestorte bloed van Christus.

Waarom is die bloed dan belangrik? Die boek aan die Hebreërs sê: “En byna alles word met bloed gereinig volgens die wet, en sonder bloedvergieting vind daar geen vergifnis plaas nie” (Heb. 9:22). Waarom *is* dit dan so? God het aan antieke Israel gesê: “Want die siel [lewe, NV] van die vlees is in die bloed, en Ek het dit aan julle op die altaar gegee om vir julle siele versoening te doen” (Lev. 17:11). Dit is duidelik dat bloedvergieting lei tot verlies van lewe. Die lewe wat hier gegee is, was dié van God se eie Seun, die Skepper van die ganse mensdom!

Paulus skryf oor Christus: “In Hom het ons die verlossing deur sy bloed, die vergifnis van die misdade na die rykdom van sy genade” (Ef. 1:7). Diegene wat Christus se offerande aanneem as betaling vir hulle sondes is nou “geregverdig ... in sy bloed” (Rom. 5:9). Die woord “geregverdig” beteken “van skuld vrygespreek” volgens die HAT of “met God versoen is deur die dood van sy Seun”, soos die volgende vers verduidelik.

Hoe verstommend, wanneer ons dit verstaan! Die Wese wat later Jesus Christus sou word, soos ons gesien het in 1 Korinthiërs 10:4, is die Een wat hierdie Feestyte aan Israel gegee het. *Hy* was die Een wat die Tien Gebooue gespreek het. *Hy* was die Een wat die Israeliete uit Egipte uitgelei het, hulle “verlos” het. *Hy* was die Een wat hulle uiteindelik die Beloofde Land ingelei het. Later was *Hy* die Een wat

Homself verneder het om 'n vleeslike mens te word en die Verlosser van die *hele wêreld* geword het deur toe te laat dat Sy bloed – die bloed van die Skepper van alle mense – uitgestort word om die volle prys vir ons sondes te betaal!

Geen wonder dat die Bybel praat van die “kosbare” bloed van Jesus Christus nie! Wanneer ons die wyn drink wat dié ontsaglike daad van nederigheid deur ons Skepper simboliseer, behoort ons inderdaad gevul te wees met diep waardering vir en ***aanbidding*** tot ons God en ons Verlosser. Soos 1 Petrus 1:18-19 ons verseker, as ons werklik berou tot bekering het oor ons sondes en Christus aanneem as ons Verlosser, dan kan ons ten volle glo dat ons nie “deur verganklike dinge, silwer of goud, losgekoop is ... nie, maar deur die kosbare bloed van Christus, soos van 'n lam sonder gebrek en vlekkeloos”. Laat ons dan die Pasga *onderhou*, ter nagedagtenis aan Jesus Christus.

Stap 2

Die Fees van Ongesuurde Brood

Ons het so pas gesien dat ons sondes van die verlede vergewe word deur Jesus Christus se Pasga-offerande en dat ons daardeur met God versoen word. Is dit die einde? Die hoofstroom Christendom antwoord dikwels, ja – dat dit eindig by die kruis en dat ons Jesus Christus bloot moet *aanvaar* as ons persoonlike Verlosser. Volgens dié redenasie, waarom moet ons dan vleeslike mense bly? Waarom kan ons nie onmiddellik verheerlik word ná vergifnis toegestaan is nie? Die antwoord: Daar is nog iets wat ons moet *doen!*

Baie Christene in naam glo dat ons “gered” is sodra ons sondes vergewe is. Ons is inderdaad *op daardie tydstip* gered van die doodsvonnis wat ons vorige sondes oor ons gebring het. Ons kan egter tog weer in sonde verval en ons saligheid verloor (Heb. 6:4-8; 10:26-31; 1 Kor. 9:27). Redding of verlossing, is dus ’n proses. Ons is nou in ’n proses om *gered te word* (1 Kor. 1:18) en uiteindelik *sal ons gered word* – indien ons tot die einde toe volhard (Matt. 24:13). In Romeine 5:10 gee Paulus dié verduideliking: “Want as ons, terwyl ons nog vyande was, met God versoen is deur die dood van sy Seun, veel meer sal ons deur sy lewe gered word nou dat ons versoen is”. Begryp dit: Indien ons slegs die Pasga onderhou, dan laat ons God se plan onvoltooid. Ons laat Jesus dood aan die kruis hang – einde van die storie! Onthou, ons Verlosser het uit die dood opgestaan! Soos ons later sal sien wanneer ons die saak dieper ondersoek, dit is deur Sy **lewe** dat ons gered *sal* word. Let weer daarop dat ons nog nie ten volle gered is nie.

Jesus stel ’n voorwaarde vir ons verlossing – met goeie rede. Hy sê: “Maar as jy in die [ewige] lewe wil ingaan, onderhou die gebooie” (Matt. 19:17). Hy sê ons aan om ons te “bekeer” (Mark. 1:15) – wat beteken om van die sonde weg te draai in die teenoorgestelde rigting, ons moet die weg van geregtigheid wandel. Met ander woorde, God wil hê dat ons ’n verbond met Hom aangaan waarvolgens ons onderneem om sonde heeltemal uit ons lewens te sit – dat ons ophou om Sy geestelike Wette te verbreek en hulle voortaan onderhou. Hy verwag dan ook dat ons dié onderneming gestand sal doen.

Die proses van oorwinning

Die apostel Paulus skryf: “Want uit genade is julle gered, deur die geloof, en dit nie uit julleself nie: dit is die gawe van God; nie uit die werke nie, sodat niemand mag roem nie” (Ef. 2:8-9). Baie mense sal egter nou reken dié vers sê dat ons verder niks *hoef* te doen nadat ons God se genadegawe ontvang het nie – dat ons nie God se Wet *hoef* te hou nie. Om egter só te redeneer, is kortsigtig, want in die volgende vers beskryf Paulus ons as God se “maaksel, geskape in Christus Jesus tot goeie werke wat God voorberei het, sodat ons daarin kan wandel” (Ef. 2:10). Dis reg, ons *hele lewenswyse* moet verander: Van ongehoorsaamheid aan God tot gehoorsaamheid aan Hom. Natuurlik weet die Here ons is nie in staat om Hom perfek te gehoorsaam terwyl ons nog vleeslike mense is nie (Rom. 7:18, 24; 1 Joh. 1:8-10). Hy verwag nogtans dat ons Sy karakter sal ontwikkel deur ’n proses van stry teen die sonde en die sonde oorwin (verwys 1 Kor. 9:24-27; Op. 2:11; 3:21; 21:7).

Ons vorige sondige lewe moet dus “met Christus gekruisig” word (Gal. 2:20). Ons word dan gedoop as simbool van ons ou natuur wat figuurlik begrawe word met Christus. Daarna kom ons op uit die “watergraf” van die doop – as simbool van ons “opstanding” tot ’n nuwe lewe in Christus. Van daar af moet ons dan lewe volgens Sy lewenswyse. Paulus verduidelik:

“WAT sal ons dan sê? Sal ons in die sonde bly, dat die genade meer kan word? Nee, stellig nie! Ons wat die sonde afgesterf het, hoe kan ons nog daarin lewe? Of weet julle nie dat ons almal wat in Christus Jesus gedoop is, in sy dood gedoop is nie? Ons is dus saam met Hom begrawe deur die doop in die dood, sodat net soos Christus uit die dode opgewek is deur die heerlijkheid van die Vader, ons ook so in ’n nuwe lewe kan wandel. Want as ons met Hom saamgegroeï het deur die gelykvormigheid aan sy dood, sal ons dit tog ook wees deur dié aan sy opstanding; aangesien ons dit weet dat ons oue mens saam gekruisig is, sodat die liggaam van die sonde tot niet gemaak sou word en ons nie meer die sonde sou dien nie ... Laat die sonde dan in julle sterflike liggaam nie heers dat julle aan sy begeerlikhede gehoorsaam sou wees nie” (Rom. 6:1-12; verwys Kol. 3:1-10).

Let daarop dat toe ons in die verlede die sonde gedien het, ons *slawe* van die sonde was, wetsoortreders. Nou moet ons “slawe” van geregtigheid wees. Wat is geregtigheid dan? In Psalm 119:172 bid

Die Heilige Dae – God se Meesterplan

Koning Dawid tot God: "... al u gebooi is geregtigheid". Die apostel Paulus vervolg in Romeine 6: "Wat dan? Sal ons sonde doen, omdat ons nie onder die wet is nie maar onder die genade? Nee, stellig nie! ... want net soos julle jul lede diensbaar gestel het aan die onreinheid en wetteloosheid om wetteloos te wees, so moet julle nou jul lede diensbaar stel aan die geregtigheid tot heiligmaking" (verse 15-19).

Die *volgende stap* in God se plan is om te ontsnap van die sondebande wat tot die dood lei en om God se lewenswyse ons eie te maak, dit heelhartig as 'n lewenswyse te beoefen. Die Almagtige het 'n spesiale Feestyd gegee om hierdie proses vir ons uit te beeld – die Fees van Ongesuurde Brood.

Laat ons die Fees onderhou

Net nadat God Moses beveel het om die Pasga te onderhou, vertel Hy Moses van die Feestyd wat daarmee saamgaan en wat begin op 15 Nisan (verwys Lev. 23:6). Ons vind hierdie Feestyd ook in Exodus 12: "Sewe dae lank moet julle ongesuurde brode eet; alreeds op die eerste dag moet julle die suurdeeg uit julle huise verwyder" (vers 15). Ons het reeds vroeër genoem dat suurdeeg enigiets insluit wat brood sal laat rys, soos koeksoda en bakpoeier of enige soort suurdeeg self. Die vers vervolg met "elkeen wat gesuurde brood eet, van die eerste dag af tot die sewende toe, dié siel moet uit Israel uitgeroei word." Dit is dus 'n ernstige saak.

God verduidelik dan verder oor hierdie Feestyd: "En op die eerste dag moet daar 'n heilige samekoms wees; ook op die sewende dag moet daar vir julle 'n heilige samekoms wees. Daar mag géén werk op dié dae gedoen word nie; net wat deur elkeen geëet moet word, dit alleen mag deur julle berei word. Onderhou dan die [Fees van] ongesuurde brode, want op daardie selfde dag het Ek julle leërs uit Egipteland uitgelei. Daarom moet julle hierdie dag in julle geslagte as 'n ewige insetting hou" (verse 16-17).

Let op! Die Fees van Ongesuurde Brood was die tyd toe God Israel uit Egiptiese slawerny verlos het. Soos reeds vermeld, is dié Feestyd vir Christene simbolies van bevryding uit die slawerny van *sonde!* Antieke Egipte, saam met Sodom en Babilon, word soms in die Bybel gebruik as die geestelike tipe van 'n sondige samelewing wat in opstand is teen God (verwys Op. 11:8; 18:4). Boonop word suurdeeg *ook* in verskeie Skrifture gebruik as simbool van sonde.

Jesus waarsku Sy dissipels teen die verraderlike, sondige leerstellings van die geestelike leiers van Sy tyd en sê vir hulle: “Pas op en wees op julle hoede vir die SUURDEEG van die Fariseërs en Sadduseërs” (Matt. 16:6). In Lukas 12:1 wys Hy daarop dat die Fariseërs en Sadduseërs veral “gesuurd” was met die suurdeeg van skynheiligheid.

Soos ons reeds gesien het, laat suurdeeg deeg rys of “opswel”, net soos ’n sondige gesindheid – of eiesinnigheid – *ons* laat “opswel” om te doen wat reg is in ons eie oë, ons “eie ding” te laat doen. Suurdeeg versprei dwarsdeur deeg net soos onbeteuelde *sonde* van persoon tot persoon versprei – ook in die Kerk van God! Die Kerk in Korinthe wou nie optree teen ’n onboetvaardige sondaar nie en Paulus moes toe aan hulle skryf om die man uit hulle midde te verwyder (1 Kor. 5:1-5). Hy verduidelik dan: “Weet julle nie dat ’n bietjie suurdeeg die hele deeg suur maak nie? Suiwer dan die ou suurdeeg uit, sodat julle ’n nuwe deeg kan wees – soos julle inderdaad ongesuurd is – want ook ons paaslam is vir ons geslag, naamlik Christus” (verse 6-7).

Hulle was in werklikheid, *letterlik gesproke*, op daardie tydstip net ná die Pasga en gedurende die Dae van Ongesuurde Brood wel ongesuurd (verwys 1 Kor. 11:17-34).

Paulus *beveel* dus die Heidene in die Kerk in Korinthe: “Laat ons dan feesvier” (1 Kor. 5:8). *Watter Fees?* Natuurlik die Fees van Ongesuurde Brood! Hy vervolg dan: “... nie met die ou suurdeeg of met die suurdeeg van ondeug [onsedelikheid, NV] en boosheid nie, maar met die ongesuurde brode van reinheid en waarheid” (vers 8).

Paulus se standpunt was dus dat, net soos wat die Korintheërs *letterlik* die Fees gehou het, moes hulle dit ook in die *regte gees* onderhou – hulle moes sonde uit hulle lewens verwyder en geregtigheid aanneem. Hier vind ons ’n duidelike Nuwe-Testamentiese gebod om die Fees van Ongesuurde Brood te *onderhou*, in die letter sowel as in die gees! Hierdie gebod is gegee aan ’n oorwegend nie-Joodse [Heidense] Kerk! Dit was nie die een of ander voormalige vorm van “Judaïsme” wat besig was om weer pos te vat in die Kerk nie! Inteendeel, die meeste van hulle het nog nooit tevore God se Feestyte onderhou nie. In vers 7 koppel Paulus die Fees van Ongesuurde Brood aan die Pasga wat dit voorafgaan. Weereens, die Pasga het te make met die vergifnis van *sondes van die verlede*, terwyl die Fees van Ongesuurde Brood die “opvolgaksie” is – vasberadenheid om met God se hulp **toe te neem**

Die Heilige Dae – God se Meesterplan

in genade en kennis (2 Pet. 3:18) om “soos ’n volgroeide mens [te] wees, so volmaak en volwasse soos Christus” (Ef. 4:13, NV).

Raak ontslae van geestelike suurdeeg

Hoe moet ons nou eintlik dié Fees *onderhou*? Wanneer die Feestyd elke jaar nader kom, moet ware volgelinge van Nuwe-Testamentiese Christendom suurdeeg en gesuurde voedselprodukte uit ons huise en van ons eiendom verwyder. Ons moet dan vir sewe dae lank ongesuurde kos eet. (Terloops, daar is niks *verkeerd* met suurdeeg nie, dit is bloot vir dié sewe dae die simbool van sonde). Indien ons tydens die Fees ’n gesuurde produk in die huis ontdek wat ons tevore misgekyk het, moet ons dit ook verwyder (Ex. 13:7).

Terwyl ons ons eiendom deeglik skoonmaak, moet ons nadink oor die feit dat, net soos die krummels van gesuurde produkte orals in gleuwe en hoekies kan versamel, sonde ook oral in ons lewens “wegkruip”. Ons sal heel verbaas wees om te sien waar suurdeeg oral voorkom! Op ’n geestelike vlak moet ons God vra om ons deeglik skoon te maak en uit te skrop, ons te wys waar daar iewers in ons diepste gedagtes nog sonde skuil. Ons moet soos Dawid bid: “Kyk, U het ’n welgevalle aan waarheid in die binneste, en in die verborgene maak U aan my wysheid bekend. Ontsondig my met hisop, dat ek kan rein wees; was my, dat ek witter kan wees as sneeu” (Ps. 51:8-9).

Ja, vir *sewe* dae – en volgens God simboliseer sewe dikwels volmaaktheid – moet ons fokus op maniere om *heeltemal ontslae te raak* van sonde. Indien ons hierdie Godgegewe Feestyde onderhou soos Hy ons beveel, word ons herinner dat ons ’n *voortdurende verantwoordelikheid* teenoor God het om Satan se versoekings te weerstaan, dié van ons samelewing wat Satan mislei het, sowel as ons eie natuur wat ingestel is op Satan se “golflengte”. Wat betref die bose invloed wat Satan voorheen op hulle gehad het, skryf Paulus só aan die Christene: “EN julle *het Hy lewend gemaak*, wat dood was deur die misdade en die sondes waarin julle tevore gewandel het volgens die loop van hierdie wêreld, volgens die owerste van die mag van die lug, van die gees wat nou in die kinders van die ongehoorsaamheid werk” (Ef. 2:1-2). Dit is inderdaad Satan, die “owerste van hierdie wêreld” (Joh. 14:30), wat sy bose en vernietigende gesindheid “uitsend”. Aangesien Paulus hierdie “mag van die lug” beskryf het lank voordat radio en televisie hulle

verskyning gemaak het, moet ons verstaan dat dit 'n *geestelike* uitsending in ons gedagtes is, van sondige drange en idees waarvoor ons ontvanklik is. Deur geloof *kan* ons dit oorwin (1 Joh. 5:4).

Afgesien van die Israeliete se tog uit Egipte gedurende hierdie Feestyd het daar nog iets van belang gebeur. Volgens Joodse tradisie het God op die laaste Heilige Dag van hierdie Fees die Rooi See op wonderbaarlike wyse oopgekloof – 'n pad gemaak sodat die Israeliete tussen twee mure van water kon deurtrek op droë grond en só ontsnap van Farao en sy leër (Ex. 14:22). Later sien die Israeliete hoe die water op die Egiptenare terugval en hulle verswelg. Volgens die Nuwe Testament, was dit 'n tipe *doopseremonie* vir die Israeliete (1 Kor. 10:2)! Ons het reeds gesien dat die doop simbolies is van die ou mens wat doodgemaak word en dan opstaan om 'n “nuwe lewe” te lei – asof ons reeds saam met Christus opgewek is. Wanneer het Christus uit Sy graf opgestaan? “Drie dae en drie nagte” ná Sy dood wat op die Pasgadamag was (verwys Matt. 12:40), gedurende die Dae van Ongesuurde Brood!

Onthou, nadat ons gedoop is, moet ons nie net die suurdeeg van sonde uit ons lewens uitwis nie, maar ons moet ook leef volgens die “ongesuurde brode van reinheid en waarheid.” Wat is egter die waarheid? Dawid sê aan God: “U wet is waarheid ... al u geboois is waarheid ... Die hele inhoud van u woord is waarheid” (Ps. 119:142, 151, 160). In gebed tot die Vader, uiter Christus dieselfde woorde: “... u woord is die waarheid” (Joh. 17:17). Ons moet inderdaad leef van elke woord van die Skrif (Matt. 4:4). Verder, Jesus is die *Lewende Woord* (Joh. 1:1-3, 14) en Hy sê dat Hy die “weg en die waarheid en die lewe” is (Joh. 14:6). Ons moet dus vir Christus volg – uit die sonde wegkom wat ons omring – deur middel van die Skrif.

Net soos die Israeliete Farao se slawerny weerstaan en uit Egipte gevlug het, moet ons ook die heerser van hierdie wêreld weerstaan (Jak. 4:7), vlug uit die omstandighede wat ons kan laat sondig (verwys 1 Kor. 6:18; 10:14) en “geregtigheid, godsaligheid, geloof, liefde, lydsaamheid, sagmoedigheid [najaag] ... die goeie stryd van die geloof [stry] ... na die ewige lewe [gryp]” (1 Tim. 6:11-12).

Dit is die *ware betekenis* van die Dae van Ongesuurde Brood!

Nie deel van die offerandewet nie

Aangaande die Fees van Ongesuurde Brood sê God aan Israel: “Maar julle moet sewe dae lank aan die HERE ’n vuuroffer bring” (Lev. 23:8). Al God se Feeste het inderdaad sekere offerandes en Levitiese rituele gehad teen die tyd dat dié betrokke opdragte gegee is. Soos ons egter weet, is die seremoniële wet van ou Israel, tesame met die diere-offers, voedsel- en drankoffers, wassing, ens., gegee “tot op die tyd van herstelling” (Heb. 9:9-10) – dus, totdat Christus gekom het en Homself geoffer het (verse 11-15). Die ou offerstelsel is toe vervang deur die *volmaakte* offerande van Jesus Christus (verwys Heb. 10:1-10). God se vorige Verbond met Israel – die Ou Verbond – wat vereis het dat seremoniële wette onderhou word, was toe uitgedien (Heb. 8:13).

Gebaseer op die feit dat die seremoniële wette nie meer vandag van toepassing is nie, dink party mense dat die jaarlikse Feeste, waartydens sekere offerandes gemaak moes word en sekere rituele nagekom moes word, ook uitgedien is. Is dit werklik die geval?

Eerstens, Hebreërs 10 haal Psalm 40 aan as bewys dat God oorspronklik nie diere-offers wou hê nie. Hy wou eerder ware geestelike gehoorsaamheid van Sy mense hê. Trouens, die Ou Testament sê uitdruklik: “... om gehoorsaam te wees is beter as slagoffer” (1 Sam. 15:22; verwys Ps. 51:16-19). Om *wat* te gehoorsaam? Natuurlik nie die wet van *offerandes* nie! Die verwysing is dus hier na ’n Wet wat *groter*, hoër is as die wet van offerandes.

Tydens die tyd toe God die Israeliete uit Egipte uitgelei het en die Ou Verbond met hulle aangaan het by Sinai, stem die Israeliete in om ’n Wet te gehoorsaam wat *nie* die seremoniële wet ingesluit het nie. Later sê God aan Israel: “Want Ek het met julle vaders, op die dag dat Ek hulle uit Egipteland uitgelei het, nie gespreek nie en hulle geen bevel gegee in verband met brandoffer of slagoffer nie. Maar hierdie saak het Ek hulle beveel, naamlik: Luister na My stem, dan sal Ek vir julle ’n God wees, en julle sal vir My ’n volk wees; en wandel net in die weg wat Ek julle beveel, dat dit met julle goed kan gaan” (Jer. 7:22-23). Dit was eers later toe Israel ongehoorsaam aan God was weens hulle afgodediens dat Hy die Levitiese priesterorde en die gepaardgaande rituele stelsel ingestel het.

Wanneer beveel God die Israeliete om die Pasga en die Dae van Ongesuurde Brood te onderhou? *Voordat hulle Egipte verlaat!* (Ex. 12 en 13). God se jaarlikse Feeste sowel as die weeklikse Sabbat (sien Ex. 16) is dus ingestel *voor* die Ou Verbond aangegaan is en *lank voor* die offerstelsel! Al is die Ou Verbond nie meer van krag nie en die Levitiese godsdienstelsel vervang, *bly* ware geestelike aanbidding egter steeds *staan* en so ook die nodigheid om God se jaarlikse Feeste te onderhou.

Buitendien, dit is eintlik verregaande om te sê dat hierdie dae nie meer onderhou moet word nie omdat offerandes altyd op sodanige dae gebring is, want daar is elke dag van die jaar offers gebring! (Num. 28:3-10). Wanneer iemand dus sê dat God se Heilige Dae saam met die offerandes verval, moet die persoon ook tot die gevolgtrekking kom dat *alle* dae in die jaar dan ook verval. Dit is verregaande. Dit is dus duidelik dat die Feestye van die Here nog onderhou moet word, al is die tempelrituele nie meer nodig nie.

Stap 3

Pinkster

Miskien beseef u nou dat elke Fees van God voortbou op die vorige een om God se plan vir die mensdom te verduidelik. Die Pasga stel ons aanvaarding van Christus se offerande ter vergifnis van ons sondes voor, nadat ons tot bekering gekom en met die Vader versoen is. Die Fees van Ongesuurde Brode stel ons getroue onderneming voor om die sonde af te lê en in genade te groei deur 'n proses van oorwinning, want ons is reeds gedoop as 'n uiterlike teken van ons innerlike, geestelike toegewydheid tot oorwinning.

Die volgende Fees is geen uitsondering nie. Net soos ons nie kan stop by die Pasga nie, kan ons ook nie by die Fees van Ongesuurde Brood ophou nie. Waarom nie? Omdat 'n groot dilemma dan te voorskyn tree. Onthou dat Christus ons aansê om die geboorte te onderhou (Matt. 19:17). Paulus sê dan: "... omdat wat die vlees [menslike gedagtes] bedink, vyandskap teen God is; want dit onderwerp hom nie aan die wet van God nie, want dit kan ook nie" (Rom. 8:7). Dit lyk dan nou asof dit onmoontlik is om aan God se vereistes te voldoen? Daar IS egter 'n uitweg, want "by God is alle dinge moontlik" (Matt. 19:26).

Ons behoort diep dankbaar te wees teenoor die Almagtige dat Hy dit inderdaad vir ons moontlik maak om Hom te kan gehoorsaam. Om dít te gedenk, bo en behalwe ander belangrike aspekte rakende Sy meesterplan, het God 'n *derde* jaarlikse Fees ingestel – die "fees van die oes" (Ex. 23:16), ook bekend as die "eersteling", die "fees van die weke" (Ex. 34:22) en die "pinksterfees" (Hand. 2:1). Dié Fees is gekoppel aan die ander Feeste wat dit voorafgaan. U sien, dit was gedurende die Dae van Ongesuurde Brood, op die dag ná 'n *weeklikse* Sabbat, dat 'n spesifieke seremonie – die "eerstelingsgerf" (OV) of "beweegoffer" (NV) – plaasgevind het (Lev. 23:9-14). Die Fees van Eersteling vind presies sewe weke later plaas – op die 50ste dag, met die dag van die beweegoffer getel as dag een (verse 15-16). Daarom dan die name "Fees van Weke" en "Pinkster", wat "vyftigste" beteken in Nuwe-Testamentiese Grieks.

Beter beloftes

Volgens Joodse tradisie het antieke Israel op dié dag die Tien Gebooië by die berg Sinai ontvang. Saam met hierdie gebeurtenis het Israel met God 'n verbond aangegaan waarvolgens hulle beloof het om Sy Wet te gehoorsaam en dan Sy uitverkore volk te wees. Dit was die begin van die Ou-Testamentiese “vergadering [of kerk] in die woestyn” (verwys Hand. 7:38). Die Israëliete ondervind spoedig dieselfde probleem waarmee *ons* worstel – die menslike natuur – gevolglik faal hulle in hulle belofte van gehoorsaamheid. Volgens Hebreërs 8 het die fout met die Ou Verbond nie by God se Wet gelê nie, maar by die mense, want hulle kon die Wet nie gehoorsaam nie (Heb. 8:7-8). Hoekom kon hulle nie gehoorsaam wees nie? Omdat hulle nie genoeg geloof gehad het nie: “Want aan ons is die evangelie ook verkondig net soos aan hulle; maar die woord van die prediking het hulle nie gebaat nie, omdat dit by die hoorders nie met die geloof verenig was nie” (Heb. 4:2).

God het dus deur Christus, nou 'n *Nuwe Verbond* in werking gestel – “'n beter verbond wat op beter beloftes ... gegrond is” (Heb. 8:6). Volgens dié Nuwe Verbond, skryf God Sy geestelike Wet – *dieselfde* Tien Gebooië in hulle volle, uitgebreide betekenis – in ons hart en verstand sodat ons nou gehoorsaam *kan wees* (vers 10). Hoe dan? Onthou dat ons, volgens Romeine 5:10, met God versoen is deur die dood van Sy Seun en “deur sy lewe gered word”. Ja, ons moet Christus se lewenswyse deel maak van ons diepste wese. Is dit egter hoegenaamd moontlik? Ja! Paulus skryf: “Ek is met Christus gekruisig, en ék leef nie meer nie, maar Christus leef in my. En wat ek nou in die vlees lewe, leef ek deur die geloof in die Seun van God wat my liefgehad het en Homself vir my oorgegee het” (Gal. 2:20). Ons ontvang eintlik die geloof van Jesus wanneer Hy en die Vader albei in ons leef (verwys Joh. 14:23). Hoe gebeur dit dan? Die apostel Johannes sê: “Hieraan weet ons dat ons in Hom bly en Hy in ons, [om]dat Hy ons van sy Gees gegee het” (1 Joh. 4:13).

Dit is dus deur die Heilige Gees dat die Vader en die Seun binne in ons lewe, en ons in staat stel om God te gehoorsaam. Paulus skryf dat “die liefde van God in ons harte uitgestort is deur die Heilige Gees wat aan ons gegee is” (Rom. 5:5). Johannes skryf ook: “Dit is die liefde tot God, dat ons sy gebooië bewaar” (1 Joh. 5:3). Dit is nie al wat hierdie wonderlike gawe behels nie. Let hierop: “Die Gees

Die Heilige Dae – God se Meesterplan

self getuig saam met ons gees dat ons kinders van God is; en as ons kinders is, dan ook erfgename, erfgename van God en mede-erfgename van Christus ... sodat ons ook saam met Hom verheerlik kan word” (Rom. 8:16-17). Die Heilige Gees is die instrument waarvolgens God ons verwek as Sy geestelike kinders – so begin die proses waardeur ons uiteindelik in Sy Koninkryk ingebore word tydens die opstanding uit die dood.

Paulus verduidelik aan die Christene: “In Christus het die Heilige Gees wat deur God belowe is, julle as die eiendom van God beseël. Die Heilige Gees is die waarborg [deposito] dat ons ook verder sal ontvang wat God belowe het, wanneer Hy almal wat aan Hom behoort, volkome sal verlos” (Ef. 1:13-14, NV). Die “beter beloftes” van die Nuwe Verbond is dus die geskenk van ewige lewe sowel as die Heilige Gees wat God aan ons bied waardeur die ewige lewe sal kom – waardeur ons nou in staat gestel word om gehoorsaam te wees. Dit lyk inderdaad asof God antieke Israel as ’n nasie gevestig en die Ou Verbond met hulle aangegaan het met die hoofdoel om te wys dat dit nie vir die mens genoeg is om net God se Wette te ontvang en onder Sy Regering en bemiddeling te staan nie – die Heilige Gees is ook nodig. As ’n volk, het Israel van ouds nooit die Heilige Gees ontvang nie. Christene kan egter, deur middel van die Heilige Gees binne-in hulle, wel ware *geloofhê* (Gal. 5:22-23), God se plan beter *verstaan* (Joh. 16:13) en so ook ’n mate van Sy eie *karakter* en *geestelike krag* ontvang om ons te help om sonde te oorwin en Sy lewenswyse tot ’n groter mate uit te leef (2 Tim. 1:6-7).

Petrus praat van hierdie wonderlike beloftes van God in 2 Petrus 1:4: “... sodat julle daardeur deelgenote kan word van die goddelike natuur”. God plaas inderdaad deur die krag van die Heilige Gees Sy eie natuur – Sy *Goddelike karakter* – in ons soos ons met Hom wandel en algaande geestelik groei. Ons moet ook meld dat, ten spyte van die idees van hoofstroom Christendom wat *buite* die oorspronklike Kerk van die Apostels ontwikkel het, die Heilige Gees *nié* ’n derde persoon in die Godheid is nie. God is *nié* ’n drie-eenheid nie. Inderwaarheid is die Heilige Gees die denke, natuur en lewe wat die Vader en die Seun deel – dis eintlik die krag waarvolgens Hulle doen en handel. (Skryf gerus vir ons gratis boekie, *Die Ware God – Bewyse en Beloftes*.)

Pinkster simboliseer ons ontvangs van dié allerbelangrikste geskenk van die Vader. Dit was op dié Heilige Dag – ná Jesus se

opstanding – dat die Heilige Gees op ’n wonderbaarlike en aanskoulike wyse aan die dissipels gegee is (Luk. 24:49; Hand. 2:1-11). Op daardie dag sê die apostel Petrus aan diegene wat toe oortuig geraak het dat hulle sondaars was: “Bekeer julle en laat elkeen van julle gedoop word in die Naam van Jesus Christus. Dan sal God sal julle sondes vergewe, en sal julle die Heilige Gees as gawe ontvang. Wat God belowe het, is vir julle en vir julle kinders en vir almal wat daar ver is, vir almal wat die Here ons God na Hom toe sal roep” (Hand. 2:38-39, NV).

Hierdie ontsagwekkende gebeurtenis was die begin van die Nuwe-Testamentiese Kerk – God se *geestelike* nasie van Israel (verwys Gal. 6:16). Slegs as ons die Heilige Gees *in* ons het, kan ons lidmate van die Kerk van God wees (Rom. 8:9; 1 Kor. 12:13; Ef. 1:22). Wat ’n wonderlike ooreenkoms! Ons het gesien dat hierdie Fees, volgens tradisie, die tyd was toe God Sy Wet aan *fisiese* Israel gegee het met die Ou Verbond en waarvolgens hulle dan Sy *Ou-Testamentiese* Kerk sou wees. Dit stem presies ooreen met Pinkster wat *ook* dié tyd was toe God aan *geestelike* Israel Sy Gees gegee het waarmee hulle in staat sou wees om Sy Wet *te onderhou* volgens die voorwaardes van die *Nuwe* Verbond en sodoende Sy *Nuwe-Testamentiese* Kerk sou word. Hierdie is net die begin van al die ooreenkomste.

God se geestelike oes

Onthou dat God se Feeste in drie seisoene verdeel kan word – vroeë lente, laat lente en herfs, in die noordelike halfmond (Deut. 16:16). [In die suidelike halfmond is dit natuurlik anders nl. herfs, winter en lente.] Interessant genoeg, posisioneer God hulle op Sy kalender om saam te val met die landboujaar in die land van Israel. Die *Oxford Companion to the Bible* verduidelik: “Sommige het die Pasga gekoppel aan die begin van die graanoes”. Dieselfde bron sê ook dat “die Fees van Weke geassosieer was met die vroeë vrugte en die einde van die graanoes. Die Huttefees was ’n vreugdevolle geleentheid aan die einde van die vrugte-oes” (1992, bl. 18).

Die Pasgaseisoen was wel die begin van die graanoes, wat plaasgevind het tydens Nisan, die eerste maand van die heilige jaar (Ex. 12:2; 13:4). U sal onthou dat Nisan eers bekend was as *Abib*, wat in Hebreeus “groen are” beteken – in hierdie geval die groen are

Die Heilige Dae – God se Meesterplan

van gars, wat net sou begin ryp word. Die beweegoffer is gehou op die Sondag gedurende die Fees van Ongesuurde Brood. Met hierdie geleentheid moes die Israeliete die “eerstelingsgerf van [hulle] oes” – dus die eerste ryp garsare – na die priester bring (Lev. 23:10). Hy moes dit namens die volk voor die HERE beweeg sodat hulle “welgevallig” of “aanneemlik” kon wees voor God (vers 11) en sodoende die HERE se seën verkry op die lente-oes.

Soos reeds genoem, is die aftelling tot Pinksterdag begin op die dag van die beweegoffer of *omer* in Hebreeus. “Dan moet julle tel van die dag ná die sabbat, van die dag af as julle die beweegoffergerf bring – sewe volle weke moet dit wees; tot die dag ná die sewende sabbat moet julle vyftig dae tel; dan moet julle ’n nuwe spysoffer aan die HERE bring. Julle moet uit jul woonplekke twee beweegbrode bring; dit moet van twee-tiendes *van ’n efa* fynmeel wees; gesuurd moet dit gebak word as eersteling aan die HERE” (Lev. 23:15-17). In hierdie geval was die spysoffer vars koring. Soos die *Oxford* verduidelik: Die Israeliete moes ’n tyd van sewe weke aftel en dan ’n offer van eersteling bring, wat nou koring was en nie meer gars nie”.

Die lente graanoes was baie belangrik vir die welstand van die nasie. Dit was egter *klein* in vergelyking met die *someroes* van ryp koring, vrugte en groente, wat tot in die herfs ingesamel is en dan gevier is as die Fees van die Insameling (Ex. 23:16; 34:22) – ook genoem die Huttefees of die Fees van Tabernakels. Die *Oxford* verduidelik dat dié Fees in die herfs [lente in suidelike halfgrond] “ietwat later as die insameling self plaasgevind het, naamlik toe die opbrengs van die lande, wingerde en boorde verwerk is in die vate en op die dorsvloer” (bl. 228).

Dit is baie betekenisvol. In die Nuwe Testament beskryf Jesus God se Werk waardeur mense in Sy Familie ingebring word as ’n “oes” (verwys Matt. 9:37-38; Joh. 4:35-36).

Kyk ’n bietjie na die eerstelingsgerfoffer tydens die beweegoffer-seremonie. *Wanneer* het dit plaasgevind? Op die eerste Sondag wat volg op die Pasga. Onthou dat Jesus Christus op die Pasgadag gesterf het en drie dae (72 uur) later uit die dood opgestaan het. Soos ons gratis boekie, *Watter Dag is die Christelike Sabbat?*, bewys, was die Pasga daardie jaar op ’n Woensdag (die *datum* van die Pasga is altyd 14 Nisan, maar van jaar tot jaar kan dit op ’n ander weeksdag val). Christus is dus opgewek teen die einde van daardie weeklikse Sabbat. Die volgende oggend – *op die Sondag van die*

beweeoffer – het Maria Magdalena die herrese Christus gesien (Joh. 20:1-16). Sy mag Hom egter toe nie aangeraak het nie: “Raak My nie aan nie, want Ek het nog nie opgevaar na my Vader nie; maar gaan na my broeders en sê vir hulle: Ek vaar op na my Vader en julle Vader, en my God en julle God” (vers 17). Later daardie selfde dag toe Maria Magdalena en die ander Maria op pad is om die dissipels te vertel, “kom Jesus hulle meteens teë en sê: Wees gegroet! Toe kom hulle nader en gryp sy voete en aanbid Hom” (Matt. 28:9). Tussen hierdie twee gebeurtenisse moes Christus dus opgevaar het na die Vader en Homself aan die Vader aangebied het!

Wat sou dit dan beteken? Wanneer ons in ag neem dat Christus die “eersteling geword [het] van die wat ontslaap het” (1 Kor. 15:20), asook die “Eersgeborene uit die dode” (Kol. 1:18; Op. 1:5) en die “eersgeborene ... onder baie broeders” is (Rom. 8:29), dan is dit duidelik. Jesus Christus was die Ware beweeoffer! Ná Sy opstanding moes Hy, as Hoëpriester, die bloed van Sy offerande aan die Vader aanbied in die hemelse Tempel (verwys Heb. 9:6-7; 21-26) om “aanvaar” te word namens ons as die “*eersteling*” of “*eerste vrugte*”. Sonder Christus se offerande en Sy voortdurende diens as Hoëpriester, sou daar geen verdere “geborenes” of “vrugte” kon wees nie.

Let daarop dat ander vrugte én ander “*eerste vrugte*” sou volg. Hoe dan so? Onthou dat daar twee groot oeste was in die noordelike halfrond, een in die lente en die ander een in die somer tot en met die herfs. Die kleiner, vroeë oes was eerste en die produkte van hierdie oes, was die *eersteling* (eerste vrugte). Die beweeoffer, as simbool van Christus, was die *eerste* van die *eersteling*. Wie word dan gesimboliseer deur die *res* van die *eersteling*? Wat dan van die laatoes (laatvrugte)?

Die Woord van God leer ons dat diegene in Sy Kerk die “*eersteling van die Gees het*” (Rom. 8:23). Dit sluit selfs die Ou-Testamentiese profete in aangesien hulle ook die Heilige Gees in hulle gehad het en deel was van die fondament waarop die Kerk gebou is (verwys 1 Pet. 1:10-11; Ef. 2:20-22). Verder is God se geestelike volk “*eersteling van sy skepsele*” (Jak. 1:18). Die 144,000 waarna Openbaring 14:1-4 verwys, word “*eersteling vir God en die Lam*” genoem. Diegene wat God se Heilige Gees het, word selfs die “*gemeente van eersgeborenes*” genoem (Heb. 12:23). Aangesien Nuwe-Testamentiese Christene en daardie enkeles wat die Heilige Gees ontvang het in Ou-Testamentiese tye eerste goes

Die Heilige Dae – God se Meesterplan

moes word – soos uitgebeeld deur die klein lente-oes – beteken dit mos nou ook dat baie meer later geoes sal word met die groot “insameling”, die groot someroes, wat tot die herfs duur.

Ja, God se Kerk, genoem die “klein kuddetjie” (Luk. 12:32), word gesimboliseer deur die klein lente-oes, want baie min mense het in hierdie “teenwoordige bouse wêreld” (Gal. 1:4) werklik God se Waarheid gevolg. Soos Jesus Christus sê aan diegene wat die regte pad *sou* volg: “Gaan in deur die nou poort, want breed is die poort en wyd is die pad wat na die verderf lei, en daar is baie wat daardeur ingaan. Want die poort is nou en die pad is smal wat na die lewe lei, en daar is min wat dit vind” (Matt. 7:13-14).

U sien, slegs diegene wat deur God geroep word, is in staat om nou berou tot bekering te beleef. Jesus sê uitdruklik: “Niemand kan na My toe kom as die Vader wat My gestuur het, hom nie trek nie; en Ek sal hom opwek in die laaste dag ... Om hierdie rede het Ek vir julle gesê dat niemand na My toe kan kom as dit hom nie deur my Vader gegee is nie” (Joh. 6:44, 65). Vandaar die woord “kerk” of “gemeente” wat vertaal is uit die Griekse *ekklesia*, ’n term gebruik in die konteks van ’n “gemeente” of “vergadering”, maar wat letterlik “geroepenes” beteken. Weereens, min mense is inderdaad nou, in ons tydvak, deur God geroep.

Dit is duidelik *nie* God se plan dat almal *nou* die waarheid sal verstaan nie. Hy laat Satan toe om steeds die mense te verblind sodat hulle *nie* kan verstaan nie (2 Kor. 4:4). Hoe vreemd dit ook al mag klink vir hoofstroom Christene wat geleer is dat God probeer om die hele wêreld nou te red, is dit *glad nie* wat die *ware* God van die Bybel doen nie! Indien die Almagtige Skepper van die heelal wel besig was om die hele wêreld tot die waarheid te bring, sou die *biljoene* mense wat deur die eeue heen in Indië, China, Afrika en oor die wêreld geleef het, tot ware Christelikheid geroep gewees het! Die oorgrote meerderheid is dood sonder dat hulle ooit van die ware Evangelie van Jesus Christus gehoor het!

Die Pinksterfees of Fees van Eerstelinge herinner ons jaarliks daaraan dat die handjievol mense wat nou uit die wêreld geroep word slegs die “eerstelinge” is en dat ’n *baie groter* oes van bekeerde manne en vroue later sal kom, soos ons nog sal sien. Wanneer ons lees van die uitstorting van die Heilige Gees op die eerste Pinkster ná Christus se dood, kan ons moedig wees dat die “geroepenes” van vandag, alhoewel hulle ’n klein groepie is, die *krag* van die Heilige Gees het om God se werk te doen, sowel as om

die sonde te oorwin en dat dié krag wel later ook aan ander mense gegee sal word.

Die twee beweegbrode

Laat ons nog 'n aspek van hierdie Heilige Dag ondersoek. Ons het reeds gesien dat daar 'n seremonie was waartydens die priester twee gesuurde brode moes beweeg as “eersteling aan die HERE” (Lev. 23:17, 20). Vandag verstaan ons dat hierdie twee brode die hele Kerk verteenwoordig, diegene wat God in die Ou- en die Nuwe-Testamentiese tye geroep het. Wat hier opvallend is, is die feit dat die brode met *suurdeeg* gebak is, terwyl God vroeër uitdruklik sê dat geen spysoffer [graanoffer] met suurdeeg aan Hom geoffer mag word nie (Lev. 2:11). Dit maak sin, want ons het gesien dat suurdeeg in die Bybel dikwels verwys na sonde en korrupsie. Hierdie is egter die een keer dat suurdeeg wel toegelaat is: “As 'n offer van eersteling mag julle dit aan die HERE bring, maar op die altaar mag dit nie as lieflike geur kom nie” (Lev. 2:12). Dié offer kon dus aan God geoffer word vir aanvaarding – maar Hy sou dit nie ontvang as 'n “lieflike geur” nie omdat daar “sonde” in was.

Beteken dit dan dat God sonde aanvaar omdat Hy hierdie brode aanvaar het? Glad nie! Terwyl ons in die vlees is, sondig ons wel nog – al is ons bekeerd (1 Joh. 1:8-10) – dit is waarom dié twee brode gesuur is. Hulle simboliseer *nie* 'n herrese, *ongesuurde* Kerk nie, maar mense van vlees en bloed wat stry teen die sonde in hulle lewens en by tye nog sondig. Ons word egter *nou* opgehou en voor God beweeg – simbolies van om iets aan God in die hemel aan te bied (Ex. 29:24, 26, 27; Lev. 7:30, 34; 8:27, 29). In die geval van Christus se beweegoffer, moes Hy *letterlik* na die hemel opvaar om Sy eie bloed as offer aan God aan te bied. Dit geld egter nie vir ons nie. Ons word nou aanvaar omdat iets anders *saam met* ons beweeg word – Christus se *sondoffer* wat ons eie suurdeeg “uitwis” wanneer ons aan God aangebied word! (verwys Lev. 23:19-20).

In antieke Israel het die Hoëpriester die Leviete as beweegoffer voor God beweeg, sodat hulle aan God kon behoort as Sy priesterorde (Num. 8:11-14). Net so beweeg *ons* Hoëpriester, Jesus Christus, ons voor die Vader – as Sy geestelike priesterorde (1 Pet. 2:5, 9). Die Vader neem ons dan aan as Sy eie. Weereens, ons word *nou* opgehef en voor Hom beweeg: “Maar God, wat ryk is in

Die Heilige Dae – God se Meesterplan

barmhartigheid, het ons deur sy grote liefde waarmee Hy ons liefgehad het, ook toe ons dood was deur die misdade, lewend gemaak saam met Christus – uit genade is julle gered – en saam opgewek [net soos die beweegbrode] en saam laat sit in die hemele in Christus Jesus, sodat Hy in die eeue wat kom, kan betoon die uitnemende rykdom van sy genade in goedertierenheid oor ons in Christus Jesus” (Ef. 2:4-7).

Natuurlik is toekomstige “eeue wat kom” die tyd waarop ons eintlik wag – wanneer ons uiteindelik verheerlik sal word, soos uitgebeeld deur die volgende Heilige Dag. Nietemin herinner Pinkster ons daaraan dat, alhoewel God nou net ’n klein klompie mense roep as geestelike oes van eersteling, Hy dié oes seën deur ons te **versterk** met Sy Gees sodat ons *kan* oorwin en geestelik *kan* groei.

Deur middel van die Heilige Gees ontvang ons die *geestelike* liefde van God – die soort liefde wat ons *moet hê* om God se gebooie te onderhou en Sy karakter in ons lewens te bou. Jaar na jaar herinner Pinkster ons aan ons unieke roeping en aan die krag, gegee deur die Heilige Gees, om, soos 2 Petrus 1:10 dit stel, ons “roeping en verkiesing vas te maak”.

Stap 4

Die Fees van Basuine (of Trompette)

Soos ons gesien het, val die eerste drie Feestyte wat God ingestel het in die eerste paar maande van die heilige jaar – in die noordelike halfgrond is dit tydens die varsheid van die lente – dit simboliseer die eerste stappe van God se meesterplan om die mensdom vry te koop. Die laaste vier Feeste kom egter heelwat later, in die *sewende* maand, wanneer somer oorgaan tot herfs in die noordelike halfgrond. Indien ons nou God se gereelde gebruik van sewe hier sou toepas, sou dit die maand voorstel van voltooiing en volmaaktheid. Aangesien die Fees van die Basuine op die *eerste* van die sewende maand val, kan ons aanvaar dat dit die finale gebeurde in God se plan *inlei*.

Lees weer God se oorspronklike gebod aan antieke Israel rakende dié Heilige Dag: “Spreek met die kinders van Israel en sê: In die sewende maand, op die eerste van die maand, moet dit vir julle ’n rusdag wees, ’n gedenkdag deur *basuingeklank*, ’n heilige vierdag [byeenkoms in NV]” (Lev. 23:24). Wat presies simboliseer hierdie Feesdag?

’n Oorlogsalarm!

In ou Israel is silwer trompette [basuine] gebruik om die volk byeen te roep, ’n teken van aksie soos om kamp te verskuif of as ’n *alarm vir oorlog!* (Num. 10:1-9). God sê inderdaad: “En as julle in jul land in oorlog kom teen die vyand wat met julle veg, moet julle met die trompette alarm blaas; dan sal aan julle gedink word voor die aangesig van die HERE julle God, en julle sal van jul vyande verlos word” (vers 9). Die trompette is dus gebruik om die troepe te waarsku en die mense byeen te roep in veldslae.

Hierdie silwer trompette is ook met die Fees van Basuine geblaas. Hulle is inderdaad met *elke* Feestyd geblaas (vers 10). Tydens die Fees van Basuine is daar egter ook ’n ander blaasinstrument gebruik. Joodse tradisie sê dat die *shofar* of ramshoring ook op hierdie dag geblaas is en die Skrif onderskryf dit. Net soos ons moderne blaasinstrumente, kon die silwer trompette verskillende note voortbring, maar die ramshoring kon net een

harde, skerp geluid voortbring. Dit word dikwels beskryf as 'n “geroep” of “lawaaï” en word nie as musikaal beskou nie – dit sou eerder dien as 'n onmiskenbare en dringende waarskuwing. In Levítikus 23:24 kom die woord “basuin” nie voor in die oorspronklike Hebreeus nie, alhoewel dit só verstaan word. Die hele frase is eintlik 'n vertaling van die woord *teruah*, wat deur die *Enhanced Strong's Lexicon* aangee word as “alarm, sein, stormlawaaï, roep, geroep of geskal van oorlog of alarm of vreugde” – dalk kan dit die beste vertaal word as 'n “opwekkingsroep”. Dit kon slegs deur die *shofar* voortgebring word.

Weereens, die trompet of ramshoring, is gebruik as 'n **oorlogs-*alarm***. Die klank daarvan het almal wat dit gehoor het met vrees vervul, want hulle het geweet dit lui die verskrikking van oorlog in! (verwys Jer. 4:19-21). Dié vreeswekkende waarskuwing onderskei die Fees van Basuine van God se ander Feestyte en plaas 'n ernstigheid op hierdie vreugdevolle geleentheid.

Ons moenie vergeet dat die verskriklikste tyd van oorlog, chaos en wêreldomwenteling nog voorlê nie! Let op dié geïnspireerde profesie in die boek van Joël: “Blaas die basuin op Sion, en blaas alarm op my heilige berg! Laat al die inwoners van die land bewe, want die dag van die HERE kom, want hy is naby – 'n dag van duisternis en donkerheid, 'n dag van wolke en wolkenag; soos die môreskemering, uitgesprei oor die berge, *kom* 'n talryke en magtige volk, wat van oudsher sy gelyke nie gehad het nie en dit hierna ook nie sal hê ... nie ... Voor hulle bewe die aarde, sidder die hemel; die son en die maan word swart, en die sterre trek hulle glans in. En die HERE verhef sy stem voor sy leërmag uit; want geweldig groot is sy leër, ja, magtig die uitvoerder van sy woord. Want die dag van die HERE is groot en uitermate vreeslik, en wie kan dit verdra?” (Joël 2:1-11). Trompetgeskal kondig dus hier aan dat die “dag van die HERE” naby is!

Dit is verstommend dat hierdie bese tydperk van menslike selfregering sal eindig met die mensdom op die drumpel van massa-uitwissing. Die Bybel het eintlik baie te sê oor 'n verskriklike toekomstige wêreldoorlog wat die hele aarde sal verswelg. Indien u meer wil weet oor hierdie verskriklike tyd, bekend as die “Groot Verdrukking” (Matt. 24:21) en die wêreldwye omstandighede wat dit sal veroorsaak, skryf gerus vir ons gratis boekies *Die Dier van Openbaring* en *Wat lê voor vir Amerika en Brittanje, asook Suid-Afrika?*.

Die mensdom sal gelukkig verhoed word om voordat dit te laat is, homself uit te wis, omdat die Grote God sal ingryp (vers 22), want dan sal die dag van die mens verby wees en die “dag van die HERE” sal begin. Dit sal egter nie begin met vrede en vreugde vir elkeen nie. Die Almagtige sal dan vrede *afdwing* op ’n opstandige mensdom, deur eerstens hulle koppige eiesinnigheid uit te wis. So sal ons Skepper ingryp om **Sy mag** te toon en ’n eiewyse beskawing te wys dat **Hy** die **Heerser** van hemel en aarde is.

Nog ander groot, aardskuddende gebeure sal dus volg op die Verdrukking. Kyk wat gaan gebeur op die “dag van die HERE”, die jaar tussen die Verdrukking en Christus se Wederkoms: “En die sewe engele met die sewe basuine het hulle gereed gemaak om te blaas. En die eerste engel het geblaas, en daar het hael en vuur gekom met bloed gemeng, en dit is op die aarde gegooi. En ’n derde van die bome het verbrand, en al die groen gras het verbrand” (Op. 8:6-7). Tydens die volgende basuin val “’n groot berg wat brand met vuur” in die see (verse 8-9) – dalk ’n asteroïde of meteor? Daarna val “’n groot ster wat soos ’n fakkel brand” uit die hemel (verse 10-11) – bots ’n komeet dalk met die aarde? Al weet ons nie presies hoe hierdie voorspellings letterlik vervul gaan word nie, is dit wel seker dat dit dui op geweldige rampe wat letterlik hierdie planeet sal skud! Elke ramp word ingelui met die blaas van ’n basuin.

Die laaste Basuin

Let ook daarop dat trompette gebruik is om die kroning van ’n nuwe koning aan te kondig, soos in die geval van Koning Salomo (1 Kon. 1:34, 39). Die vredevolle regering van Salomo, ná sy vader Dawid se oorloë, tipeer die toekomstige Heerskappy van die Prins van Vrede, Jesus Christus (verwys 1 Kon. 4:25; 1 Kron. 28:5).

Die Lewende Jesus Christus sal dan uiteindelik op bonatuurlike wyse ingryp om ’n opstandige mensdom te **red** en ware **vrede** aan die wêreld te bring. Terug by die laaste van die sewe basuine van Openbaring lees ons: “EN die sewende engel het geblaas, en daar was groot stemme in die hemel wat sê: Die koninkryke van die wêreld het die eiendom van onse Here geword en van sy Christus, en Hy sal as Koning heers tot in alle ewigheid” (Op. 11:15). Jesus sal dus na die aarde terugkeer as “Koning van die konings en Here van die here” (1 Tim. 6:15; Op. 19:16).

Dit is dus duidelik dat Christus terugkeer met die *sewende basuin!* Aan Sy dissipels het Hy gesê: “EN dadelik ná die verdrukking van daardie dae sal die son verduister word, en die maan sal sy glans nie gee nie, en die sterre sal van die hemel val, en die kragte van die hemele sal geskud word. En dan sal die teken van die Seun van die mens in die hemel verskyn, en dan sal al die stamme van die aarde rou bedryf en die Seun van die mens sien kom op die wolke van die hemel met groot krag en heerlikheid. En Hy sal sy engele uitstuur met harde trompetgeluid, en hulle sal sy uitverkorenes versamel uit die vier windstreke, van die een einde van die hemele af tot die ander einde daarvan” (Matt. 24:29-31).

Wat is die betekenis daarvan dat Christus engele uitstuur om Sy uitverkorenes byeen te bring? ’n Gedeelte van die antwoord vind ons in Paulus se woorde: “Maar nou, Christus is opgewek uit die dode; Hy het die eersteling geword van die wat ontslaap het” (1 Kor. 15:20). Let egter op na wat Paulus verder sê: “Want aangesien die dood deur ’n mens [Adam] is, is die opstanding van die dode ook deur ’n mens [Christus]. Want soos hulle almal in Adam sterwe, so sal hulle ook almal in Christus lewend gemaak word; maar elkeen in sy eie orde: as eersteling Christus [as die *eerste* van die eerstelinge], daarna die wat aan Christus behoort by sy koms [die *res* van die eerstelinge]” (verse 21-23).

Wanneer gaan dit gebeur? Paulus sê: “Kyk, ek deel julle ’n verborgenheid mee: Ons sal wel nie almal ontslaap nie, maar ons sal almal verander word, in ’n oomblik, in ’n oogwink, by die laaste basuin; want die basuin sal weerklink, en die dode sal onverganklik opgewek word; en ons sal verander word” (verse 51-52). Miskien is daar niks méér bemoedigend nie as hierdie verstommende feit. Paulus skryf aan die Kerk in Thessalonika:

“MAAR, broeders, ek wil nie hê dat julle onkundig moet wees met betrekking tot die ontslapenes nie, sodat julle nie treur soos die ander wat geen hoop het nie. Want as ons glo dat Jesus gesterwe en opgestaan het, dan sal God ook so die wat in Jesus ontslaap het, saam met Hom bring. Want dit sê ons vir julle deur die woord van die Here, dat ons wat in die lewe oorbly tot by die wederkoms van die Here, die ontslapenes hoegenaamd nie sal vóór wees nie. Want die Here self sal van die hemel neerdaal met ’n geroep, met die stem van ’n aartsengel en met geklank van die basuin van God; en die wat in Christus gesterf het, sal eerste opstaan. Daarna sal ons wat in die lewe oorbly, saam met hulle in wolke weggevoer word die Here

tegemeet in die lug; en so sal ons altyd by die Here wees” (1 Thess. 4:13-17).

Dit is verbysterend en wonderlik! Met Christus se Wederkoms sal diegene wat die Heilige Gees van God het, verander van swak, vlees-en-bloed mense na goddelike, onsterflike *geestelike* wesens met dieselfde heerlijkheid en voorkoms as ons Verlosser, Jesus Christus (1 Kor. 15:45, 49; Rom. 8:11; 1 Joh. 3:2). Ons sal dan ten volle verheerlikte “kinders van God, ... kinders van die opstanding” wees (Luk. 20:36) en “heeltemaal vervul word met die volheid van God” (Ef. 3:19, NV).

Geen wonder dat koning Dawid begryp het dat die Fees van Basuine, net soos al God se Feestye, ’n geleentheid was om te jubel en te juig nie (Ps. 81:2-4). Dit was ’n insetting vir Israel (vers 6), want ten spyte van die erns van die ramshoringklank, was die Fees van Basuine ’n dag van vreugde en vrolikheid, want die ramshoring was nie net ’n oproep tot oorlog nie, maar sou eendag letterlik die *dooies opwek* uit hulle dodeslaap! Baie Jode het dit ook só verstaan. Volgens die Talmud – die Joodse kommentaar op die Skrif – sal die opstanding van die dode op hierdie selfde dag geskied (*Rosh Hashanah 16b*). Dit is hoogs waarskynlik. Is dit nie interessant dat belangrike aspekte van dit wat die vorige Feesdae simboliseer, altyd vervul is op dié spesifieke dae nie? Eintlik behoort dit ons nie te verbaas nie, want onthou, hierdie dae is die vasgestelde “afsprake” met God. Net soos Christus gekom het om die eerste Feesdae te vervul, sal Hy ook die latere vervul (verwys Hos. 6:3).

Die dag van Trompette simboliseer die belangrikste oomblik wat daar ooit sal wees: God se *massiewe* ingryping in die mensdom se sake deur Jesus Christus se Wederkoms as die Koning van die konings en as die klimaks van die *sewende* of *laaste*, basuin. Kan u uself voorstel: ’n Groot, verblindende LIG, so helder dat ’n mens nie eens daarna kan kyk nie? Dit is hoe die gesig van die herrese Christus sal lyk wanneer Hy terugkeer in *heerlikheid!* Kan u uself dit voorstel: ’n Oorverdowende *trompetgeskal*, so erg dat dit letterlik die aarde skud wanneer Christus in al die onmeetlike krag van God terugkeer? Kan u uself dit voorstel: Hoe God se ware heiliges, nou opgewek uit die dood en wedergebore uit die Gees, die lugruim invaar om Christus te ontmoet om gekroon te word as goddelike konings en priesters om saam met Hom oor hierdie planeet te *heers?* (verwys Op. 2:26-27; 5:10). Wat ’n dag!

Ja, *al* hierdie dinge sal gebeur met die laaste basuin! Alhoewel die Fees van Basuine die aaklige *oorloë* en *plae* aan die einde van hierdie menslike beskawing simboliseer, simboliseer dit ook die wonderlike *ingryping* van die Skepper, wat finaal die orde sal herstel en ware *vrede* en *vreugde* bring aan 'n gekastyde mensdom wat uiteindelik gereed sal wees om na Hom te luister en Sy regverdige weë te volg.

Kolossense 2:16-17

God se Feeste bloot 'n skaduwee?

In Kolossense 2 skryf die apostel Paulus: “Laat niemand julle dan oordeel in spys of in drank of met betrekking tot 'n fees of nuwemaan of sabbat nie, wat 'n skaduwee is van die toekomstige dinge” (verse 16-17). Die Nuwe Vertaling sê in vers 17: “Dit is alles maar net die skaduwee van wat sou kom; die werklikheid is Christus.” Baie mense sê dit is geskryf as bewys dat ons nie die Heilige Dae hoef te onderhou nie. Is dit egter werklik so?

Eerstens moet ons daarop wys dat bogenoemde gedeelte verkeerd vertaal is. Die woorde “in spys of in drank” behoort vertaal te word as “met die eet of drink van” (W R Smith, *Expositor's Greek Testament*, vol. 3, bl. 530). Vervolgens, “met betrekking tot”. Die *Enhanced Strong's Lexicon* verduidelik dat die Griekse naamwoord *meros* eintlik hier gebruik is en dit beteken “deel” of “porsie” (No. 3313). “Met betrekking tot” behoort dus vertaal te word met “gedeeltelik” of “proporsioneel”. Dit is duidelik dat die nie-Joodse Christene met wie Paulus hier praat, wel sodanige Feeste, Nuwe Mane en Sabbatte moes onderhou as hulle deur ander mense oor die een of ander aspek van hulle onderhouding veroordeel is! (Terloops, ware Christene onderhou in 'n sekere sin die Nuwe Mane aangesien ons die lunisolar Hebreeuse kalender gebruik om die tye van God se Feeste te bepaal.)

Dit blyk dat die nie-Joodse Christene veroordeel is omdat hulle OP hierdie spesifieke tye geëet en gedrink het. Verskeie Bybelverklaarders gee toe dat Paulus in die boek van Kolossense waarsku teen 'n vals leerstelling bekend as Gnostisisme – 'n mengsel van Joodse en Heidense filosofieë wat geleer het dat die

vlees en fisieke plesiere boos is. Paulus verwys na hulle streng onthouding regulasies as “raak nie, smaak nie, roer nie aan nie” (vers 21). Hy noem ook hulle vals “behae hê in nederigheid en verering van die engele” (vers 18). Paulus is beslis nie hier besig om **God** se Feeste aan te val nie, maar wel die “gebooue en leringe van mense” (vers 22).

Baie van die gnostiese gebruike het hulle oorsprong gehad in die Joodse sekte bekend as die Essene. Volgens die Joodse historikus Joséfus (eerste eeu n.C.), het hulle die Sabbat so streng onderhou dat hulle nie eens liggaamsfunksies soos op ander weksdae verrig het nie. (*Wars of the Jews*, bk 2, hfst. 8, deel 9). Geen wonder dat die Gnostici ontevrede was oor die Christene se *vreugde en feesviering* op die weeklikse en jaarlikse Sabbatte nie!

Gevolgtreklik waarsku Paulus die gelowiges in Kolossense om nie toe te laat dat dié buitelanders hulle oordeel oor hoe hulle hierdie dae moes hou nie “wat ’n skaduwee is van die toekomstige dinge” (vers 17). Tog beskou baie mense hierdie vers as ’n negatiewe uitspraak oor die Feesdae – dat hulle nie meer onderhou moes word nie omdat hulle bloot ’n skaduwee is van die werklikheid wat nou in Christus gekom het. Let egter daarop dat Paulus sê hulle IS ’n skaduwee, nie **was** ’n skaduwee nie. Die Feesdae moet dus steeds onderhou word.

Waarom noem Paulus hulle dan ’n skaduwee? Want hulle is! Soos hierdie boekie aandui, wys die Feesdae God se groot daad uit in Sy plan om die mensdom te red. Paulus probeer om die Kolossense daarop te laat fokus. Eintlik sê hy vir hulle: “Kyk, moenie bekommerd wees oor buitelanders se kritiek nie – hulle is vol fiemies oor wat om te eet, te drink en selfs die gebruik van die badkamer op hierdie dae. Fokus liever op die **groot prent** wat deur dié dae gesimboliseer word!”

Professor Troy Martin skryf in sy *Journal of Biblical Literature*: “Hierdie Christelike gebruike mag die skaduwee behels en hulle word nie negatief gestel nie, behalwe deur die teenstanders daarvan ... Dit is in die teenwoordige tyd gestel en bevestig dat hierdie dinge **tans** wel skaduwees is ... Die teks gee ’n **teenwoordige**, alhoewel tydelike, geldigheid aan die skaduwees” (Somer 1995, bl. 249).

Waarom sê Paulus dan in vers 17: “... maar die liggaam behoort aan Christus”? Die antwoord is: Hy sê dit nie! Die korrekte vertaling uit die oorspronklike Grieks is: “... die liggaam *van* Christus”, wat na die Kerk van God verwys (1 Kor. 12:27; Ef. 4:12). Dit stem

ooreen met Paulus se ander verwysings in Kolossense. Christus, skryf hy, “is die Hoof van die liggaam, *naamlik* die gemeente [kerk]” (Kol. 1:18). Slegs ’n paar verse verder in Kolossense 1 sê Paulus dat die Gnostiese kritici “nie vashou aan die Hoof [Christus] nie, uit wie die hele liggaam [die Kerk] ... met goddelike groei groot word” (Kol 2:19).

Nou wat sê Paulus dan hier? Professor Martin verduidelik dat die woord “behoort” eintlik die verkeerde woord was om te gebruik (bll. 252-253). As voorbeeld verwys hy na 1 Korinthiërs 10:24: “Laat niemand sy eie voordeel soek nie, maar elkeen die voordeel van ’n ander.” ’n Mens verstaan dat die tweede deel van die sin wel so moet lees: “... maar [laat] elkeen die voordeel [soek] van ’n ander”. Kolossense 2:16-17 is baie dieselfde: “Laat niemand julle dan oordeel in [hoe julle die Feeste onderhou nie] ... maar [laat] die liggaam van Christus [oordeel]”. Hoe om ’n “Fees of nuwe maan of Sabbat te hou”, word dus nie deur kritici van buite bepaal nie, maar deur die Kerk, wat deur Christus gelei word.

Stap 5

Die Versoendag

Indien die Fees van Basuine die ontsaglike skok vir die nasies en Christus se Wederkoms in alle krag simboliseer, wat is die volgende stap in God se meesterplan ná die Wederkoms van Christus?

Onthou dat die nasies vandag eintlik in opstand is teen God en Sy weë omdat *hulle mislei is*. In Sy alwysheid en begrip het die ewige God die mens vryheid van keuse gegee en dit terwyl Hy wéét dat die mensdom sekerlik hulle *eie kop sou volg* voordat hulle sou leer dat **God** se weg die regte keuse is. God laat daarom toe dat die mensdom mislei word – dat die mensdom vir die oorgrote duur van hulle byna 6,000-jaar se geskiedenis “afgesny” sou wees van God.

Die misleiding het hoofsaaklik gekom van die “god van hierdie wêreld” – Satan. Hy is die oorsaak dat die ware Evangelie van Jesus Christus “bedek” is (2 Kor. 4:3-4). In ’n vers wat ons tevore ondersoek het, verwys Johannes na hom as die “groot draak ... die ou slang wat genoem word duiwel en Satan, wat die hele wêreld verlei (mislei)” (Op. 12:9). Soos ook reeds genoem, is dit sy direkte invloed en geestelike “uitsendings” wat die mensdom op ’n dwaalspoor bring (verwys Ef. 2:1-2).

Wanneer daar dus werklike vrede vir alle nasies asook ’n gees van samewerking onder die mensdom gaan wees, dan moet Satan verban word reg aan die begin van Christus se Heerskappy! Dit is presies wat gaan gebeur, gesimboliseer deur die volgende van God se Feeste, wat volg net nege dae ná die Fees van Basuine.

Let op die verordening van hierdie Fees in Levítikus 23: “Maar op die tiende van hierdie sewende maand is dit die versoendag. ’n Heilige vierdag moet dit vir julle wees; dan moet julle jul verootmoedig en aan die HERE ’n vuuroffer bring. En op daardie selfde dag mag julle géén werk doen nie, want dit is ’n versoendag om vir julle versoening te doen voor die aangesig van die HERE julle God” (verse 27-28).

Die Afrikaanse woord “Versoendag” gee die werklike betekenis van hierdie dag, want dit kom van die Hebreuse woord *Yom Kippur* en *kippur* en is afgelei van ’n ander woord *kaphar*, wat beteken om te “bedek”. Ons kan dit koppel aan Romeine 4:7-8: “Welgeluksalig is hulle wie se ongeregtighede vergewe en wie se sondes bedek is. Welgeluksalig is die man aan wie die Here die sonde nie toereken

nie”. Wanneer ons Christus se offerande in geloof aanneem, word ons met God versoen. Die Engelse woord “*Atonement*” dra die betekenis van “*at-one-ment*”, wanneer ons een word met God.

Op die Versoendag moes die Israëliete hulle verootmoedig, hulle moes *vas* (Jes. 58:3, 5; Ps. 35:13; 69:11) – dus vir ’n tydperk geen water en geen kos inneem nie (Ex. 34:28; Ester 4:16). Wat is die *doel* van vas? Dit is ’n manier om onself te verootmoedig en ’n meer intieme verhouding met God te bou en om tot die besef te kom van ons eie nietigheid. Namate ons begin swak voel omdat ons geen voedsel inneem nie, begin ons besef dat ons eintlik nie so “watwonders” is nie – dat ons patetiese mensies is wat gou sal sterf as God ons nie gedurig voorsien van die nodige nie (verwys Hand. 17:28). Dit dwing ons om te fokus op ons *algehele afhanklikheid* van God en om Hom in gebed te *soek*. Dit help ons dan ook om te dink aan geestelike dinge in plaas daarvan om die vlees te probeer bevredig met voedsel. As ons “drink” van God se Gees en “eet” van Sy Woord, begin ons verstaan dat dít is waar ons lewe *werklik* vandaan kom. Soos Christus aan Satan sê: “Daar is geskrywe: Die mens sal nie van brood alleen lewe nie, maar van elke woord wat deur die mond van God uitgaan” (Matt. 4:4). Om te vas beteken nie, soos sommige dit sien, dat ons *ons wil* op God *afdwing* nie (verwys Jes. 58:4; Jak. 4:3). Dit help ons eerder om Sy wil beter te verstaan en daarvolgens te lewe (Esra 8:21; verwys 1 Joh. 5:14).

Jesus Christus het gesê dat Sy ware diensknegte wel *sou* vas (Matt. 9:15). Alhoewel Hy nie spesifiek na die Versoendag verwys het nie, weet ons dat hierdie Feestyd vandag nog steeds ’n vasperiode vir Christene is. Ons lees in die Nuwe Testament dat selfs die Apostel aan die Heidene onteenseglik die Versoendag *onderhou* het – jare nadat alles dan kwansuis aan die kruis gespyker sou wees (verwys Hand. 27:9)!

’n Jaarlikse ritueel

Wat presies is die betekenis van hierdie dag? ’n Baie duidelike aanduiding van die ware betekenis word in Levítikus 16 gegee. Daar vind ons ’n Ou-Testamentiese ritueel wat gehou is “in die sewende maand, op die tiende van die maand” (vers 29) – die Versoendag! In hierdie hoofstuk word die woord “versoening” 13 keer genoem.

Die seremonie draai om die Tabernakel, wat ’n tipe van die hemelse Tempel is (Heb. 8-9). Dit was in twee verdeel. Die voorste

deel, bekend as die Heiligdom, was waar Israel se hoëpriester – aanvanklik Moses se broer Aäron – en sy seuns ingegaan het om verskeie priestertake te verrig. Die agterste deel, die Allerheiligste, waarin die Ark van die Verbond met die Versoendeksel was – die aardse “voorbeeld” van God se hemelse troon – was geskei van die voorste deel deur ’n dik voorhangsel. Niemand kon die Allerheiligste binnegaan nie, behalwe die hoëpriester en ook net een maal per jaar op die Versoendag (Lev. 16:2; Heb. 9:7).

In dié ritueel moes die hoëpriester self eers gereinig word van sy eie sonde deur ’n jong bul as sondoffer vir homself en vir sy huisgesin te offer en dan die bloed in die Allerheiligste inneem en dit op die Versoendeksel sprinkel (Lev. 16:5, 11-14; verwys Heb. 5:1-3). Die rede was dat hy ’n tipe sou wees van die sondelose, volmaakte Hoëpriester wat later sou kom, Jesus Christus (Heb. 3:1; 4:15). Christus was sonder sonde en het *nie* só ’n versoening vir Homself benodig nie (Heb. 7:26-28).

Vir die belangrikste deel van die ritueel is Aäron aangesê: “En van die vergadering van die kinders van Israel moet hy twee bokramme as sondoffer ... neem ... Hy moet ook die twee bokke neem en hulle voor die aangesig van die HERE stel by die ingang van die tent van samekoms. En Aäron moet oor die twee bokke die lot werp, een lot vir die HERE en een lot vir Asásel” (Lev. 16:5-8). Let daarop dat om die lot te werp hier nie gegaan het om tot ’n toevallige keuse te kom soos mense vandag doen met dobbelstene of lootjies trek nie. Dit was ’n beroep op GOD om die uitslag van die lot te *beheer*, God moes *besluit* wat elke bok sou verteenwoordig.

Laat ons eerstens kyk wat het gebeur met die bok wat “vir die HERE” was – die een wat die God van Israel sou verteenwoordig, die Een wat Homself later geledig het en ons Verlosser geword het (verwys 1 Kor. 10:4). “Dan moet Aäron die bok aanbring waar die lot vir die HERE op gekom het en hom as sondoffer berei ... Dan moet hy die sondofferbok slag wat vir die volk bedoel is, en sy bloed binnekant die voorhangsel bring en met sy bloed doen soos hy met die bloed van die bul gedoen het: hy moet dit sprinkel op die versoendeksel en voor die versoendeksel. So moet hy dan vir die Heiligdom versoening doen vanweë die onreinhede van die kinders van Israel en vanweë hulle oortredinge, wat hulle sondes ook al mag wees; so moet hy dit ook doen vir die tent van samekoms wat by hulle te midde van hulle onreinhede woon” (Lev. 16:9, 15-16).

Die Heilige Dae – God se Meesterplan

Die betekenis hiervan is onmiskenbaar. Die Nuwe Testament bevestig dit. In die konteks van die Versoendag (verwys Heb. 9:7), lees ons: “Maar Christus, wat opgetree het as Hoëpriester van die toekomstige weldade, het deur die groter en volmaakter tabernakel wat nie met hande gemaak is nie, dit wil sê, wat nie aan hierdie skepping behoort nie, **ook nie met die bloed van bokke en kalwers nie, maar met sy eie bloed, een maal ingegaan in die heiligdom en ’n ewige verlossing teweeggebring** ... Want Christus het nie ingegaan in ’n heiligdom met hande gemaak, ’n teëbeeld van die ware nie, maar in die hemel self om nou voor die aangesig van God vir ons te verskyn ... om die sonde deur sy offer weg te doen” (Heb. 9:11-26).

Die bok simboliseer dus Jesus Christus wat geoffer is vir ons sondes. Verder simboliseer die hoëpriester die herrese Christus wat die hemel ingaan om Sy bloed as offerande aan die Vader te bied. Wat gebeur volgende? Die hoëpriester kom *uit* die Tabernakel en reinig Israel dan simbolies met die bloed. Net so tree Jesus Christus tans vir ons in as ons Hoëpriester en sal Hy eendag terugkeer uit die hemel – om wie te reinig? Is diegene in God se Kerk nie reeds al gereinig deur Christus se offerande nie? Natuurlik, want Christus se offerande word gesimboliseer deur die Pasga. Waarom is daar dan later ’n seremonie in die herfs wat Sy offerande simboliseer?

Hier is die verduideliking. Die Pasga verteenwoordig die offerande van Christus self. Die Versoendag volg ná die Fees van Basuine, wat God se ingryping in wêreldgebeure simboliseer, met Christus se Wederkoms as hoogtepunt. Hierdie vasdag simboliseer dan daardie tyd wanneer die Pasga-offer finaal op die hele mensdom toegepas word – die afstammeling van die Israëliete is eerste aan die beurt.

Onthou dat Joël 2:1-11 die verskriklike dag van die HERE beskryf, soos ons gesien het in die gedeelte oor die Fees van Basuine. Joël vervolg dan: “Maar selfs nou nog, spreek die HERE, bekeer julle tot My met julle hele hart, en met vas en geweene rouklag. En skeur julle hart en nie julle klere nie, en bekeer julle tot die HERE julle God; want Hy is genadig en barmhartig, lankmoedig en groot van goedertierenheid ... Blaas die basuin op Sion, heilig ’n vasdag, roep ’n vergadering saam! Versamel die volk, heilig die gemeente” (verse 12-16). Die volgende paar verse beskryf hoe God die moderne afstammeling van antieke Israel – wat teen Hom in opstand is – uit slawerny sal red.

Ja, nadat die laaste basuin geblaas is, sal almal wat oorbly van die twaalf stamme van Israel – en nie net die Jode nie – teruggeneem word na die Heilige Land in ’n tweede eksodus: “En in dié dag sal daar met ’n groot basuin geblaas word; dan sal kom die wat verlore is in die land Assur en die wat verdryf is in Egipteland, en hulle sal die HERE aanbid op die heilige berg in Jerusalem” (Jes. 27:13; verwys 11:11-12).

Die vreeslike beproewing wat hulle gaan beleef – met inbegrip van “geforseerde vas” as gevolg van hongersnood – sal hulle verootmoedig en nederig laat, uiteindelik bereidwillig om God te soek in ware *geestelike* vastye, met ’n onderdanige gesindheid. Selfs die oorblywende Jode sal besef dat die Man wat hulle voorvaders gekruisig het, niemand anders was nie as hulle God in die vlees. Soos Sagaría 12:10 namens die Here sê: “... en hulle sal opsien na My vir wie hulle deurboor het, en hulle sal oor Hom rouklaag soos ’n mens rouklaag oor ’n enigste seun en bitterlik oor Hom ween soos ’n mens bitterlik ween oor ’n eersgebore kind.”

Die Israeliete sal dan – gevolg deur die res van die mensdom – die versoening bekom wat moontlik gemaak is deur die bloed van Jesus Christus as die *Pasga-offerande* en sal hulle van hulle sondes skoon gewas word. Dit is interessant dat, alhoewel die Jode nie nou die betekenis van die Versoendag verstaan nie, hulle nogtans die Versoendag beskou as die heiligste en soberste dag van die jaar – soos ware Christene die Nuwe-Testamentiese Pasga beskou.

Die Asásel bok

Die vergifnis van Israel se sondes is nie die enigste gebeurtenis met Christus se Wederkoms nie. Daar is ’n ander element in Levítikus 16 wat nog verduidelik moet word – die *ander* bok. Kyk wat die hoëpriester moes doen wanneer hy uit die Tabernakel kom: “... maar die bok waar die lot vir Asásel op gekom het, moet lewendig voor die aangesig van die HERE gestel word, om oor hom versoening te bewerk deur hom vir Asásel in die woestyn te stuur” (vers 10). Dan kom die verdere bevel: “Aáron moet sy twee hande op die kop van die lewendige bok lê en oor hom belydenis doen van al die ongeregtighede van die kinders van Israel en al hulle oortredinge, wat hulle sondes ook al mag wees; en hy moet dié op die kop van die bok lê en hom deur ’n man wat gereed staan, na die

Die Heilige Dae – God se Meesterplan

woestyn toe stuur. So moet die bok dan op hom al hulle ongeregtighede na 'n woeste land wegdra; en hy moet die bok in die woestyn los" (verse 21-22).

Wat is die simboliek van die Asásel bok dan? Omdat dit sondes moes wegdra, dink party mense dat dit slegs nog 'n simbool is van Christus se offerande. Waarom sou Christus ons sondes dra en sterf, Sy bloed aan die Vader op Sy hemeltrou gaan aanbied as versoening vir ons sondes en dan terugkom om weer daardie sondes op Homself te neem? Dit maak geen sin nie.

Wat die Joodse skrywers sê, maak wel sin, naamlik dat Asásel die naam van 'n bese gees [demon] is! (*Jewish Encyclopedia*, bl. 281). Trouens, in die apokriewe boek van Henog is Asásel die leier van bese geeste (8:1; 10:4). Dit beteken dat Asásel niemand anders is as Satan die teenstander nie. Geen wonder ook dat die man wat hierdie bok die woestyn moes inneem, homself en sy kleres in water moes was nie (Lev. 16:26), want simbolies moes hy gereinig word omdat hy in kontak was met 'n "onrein gees", soos die Bybel herhaaldelik noem. Eintlik was dit die *opperste* onrein gees, die verpersoonliking van boosheid. Hierdie man is dus gebruik om die *duiwel* vër van God se volk af te verwyder.

Dit is, volgens die Nuwe Testament, *presies* wat sal gebeur nadat Christus teruggekeer het aarde toe. Sy Wederkoms as Koning van die konings is opgeteken in Openbaring 19:11-21. In hoofstuk 20 lees ons dan dat 'n engel gestuur word om *Satan te verwyder*: "En hy het die draak gegryp – die ou slang wat die duiwel en die Satan is – en hy het hom gebind duisend jaar lank, en hom in die afgrond gewerp [die woestyn van Levítikus 16] en hom toegesluit en dit bo hom verseël, sodat hy die nasies nie meer sou verlei totdat die duisend jaar voleindig is nie. Daarna moet hy dan 'n kort tydjie ontbind word" (verse 2-3). Dit is duidelik dat die mensdom **heeltmaal buite die bereik** gaan wees van Satan –Asásel, die teenstander.

Nou waarom is dit alles nodig vir versoening? In die eerste plek is Satan die "aanklaer" wat gedurig die volk van God se sondes by God aandra (verwys Op. 12:10). Die Ewige God wis ons sondes heeltmaal uit: "So ver as die ooste verwyderd is van die weste" (Ps. 103:12). Hy wil hê dat ons sondes "bedek" moet wees, nie gedurig "opgediep" moet word nie. **Om dus ware versoening te bewerkstellig, moet Satan verhinder word om ons sondes wat reeds vergewe is steeds op te haal.** Verder moet u onthou dat Israel

se hoëpriester die sondes van die volk, figuurlik gesproke, op die kop van die Asásel bok geplaas het. U kan dalk vra: “Indien Christus vir ons sondes gesterf het, waarom word dit op Satan geplaas?” Die antwoord is dat daar ten minste twee skuldige partye is wanneer ons sondig. *Ons* is skuldig omdat ons toegee aan die versoeking en dan sondig. *Wie* versoek ons dan in die eerste plek? Dit is die “versoeker” (verwys Matt. 4:3; 1 Thess. 3:5) – Satan die duiwel. Hy is trouens meer skuldig – want, hy is die aanhitser vir *alle* sonde (verwys Joh. 8:44)!

U sien, Christus het gesterf vir *ons aandeel* van ons sonde, nie vir Satan se groter aandeel nie. Dit is dan mos net reg dat Christus op die ou end die **uiteindelike blaam lê presies waar dit hoort – op die hoof van die teenstander**. Satan, die aartsbedrieër en versoeker, sal dan verban word na die “afgrond”, ’n simboliese “woestyn”, waar hy ingeperk en opgesluit sal word. Dit kan wel ook gebeur op die presiese Heilige Dag wat dit simboliseer – op 10 Tishri, die Versoendag – want soveel ander aspekte van God se plan gebeur op die spesifieke dag waarvan hulle die simbool is.

Dit is merkwaardig hoe vêr Satan se misleiding strek. In sommige Engelse Bybelvertalings word die Asásel bok die “scapegoat” genoem, met die betekenis van iemand wat onskuldig is en die blaam moet dra – Satan wat homself voordoen as ’n onskuldige slagoffer en nie geblameer kan word nie. Die alomteenwoordige God weet beter. *God is regverdig!* Hy sal die enorme *skuld* op Satan se kop lê, want dis *hy* wat die mensdom teen God aanhits – dis *hy* wat die hele mensdom *mislei* om te dink dat God “onregverdig” is en dat Sy Wette en weë nie goed is nie. Die betekenis van die woord “sondebok” word in Afrikaans in die HAT aangegee soos in Levítikus 16 én as “iemand wat vir alles die skuld kry”. Die Nuwe Afrikaanse Vertaling verwys na die bok as die “sonde-offer”.

Nou kom ons by ’n baie belangrike rede waarom Satan verban gaan word. **Dit is om te keer dat hy die mensdom mislei gedurende Christus se duisendjarige Heerskappy!** (verwys Op. 20:3). *Dit* is waarom die mensdom dan gou versoen sal word met God se weë – *daar sal geen sataniese invloed meer wees nie*. *Dit* is waarom, gedurende Christus se glorieryke Heerskappy, “Hulle sal geen kwaad doen of verderf aanrig op my hele heilige berg nie; want die aarde sal vol wees van die kennis van die HERE soos die waters die seebodem oordek” (Jes. 11:9).

Jesaja verduidelik ook verder hoe God die mensdom se blindheid heeltemal sal wegneem: “En Hy sal op hierdie berg vernietig die uitgespreide sluier wat al die volke omsluis, en die omhulsel waarmee al die nasies bedek is. Hy sal die dood vir ewig vernietig, en die Here HERE sal die trane van alle aangesigte afvee; en Hy sal die smaad van sy volk van die hele aarde af wegneem; want die HERE het dit gespreek” (Jes. 25:7-8). Met Satan se “uitsendingstelsel” tot niet en die *blindheid* van die mensdom uit die weg geruim, sal die mens inderdaad “een” word met God.

Gedagtig aan hierdie dinge behoort ons dié jaarlikse afspraak met God te onderhou deur te vas en innig te bid om van booshede in ons lewens ontslae te raak. Daar is ’n interessante geval in die Bybel waar Christus se dissipels duiwels uitdryf terwyl hulle die Waarheid verkondig. Op ’n keer kry hulle te doen met ’n baie sterk duiwel wat nie wou luister en die persoon verlaat nie (Matt. 17:14-16). Christus dryf toe wel later daardie duiwel uit. Die dissipels wou toe weet waarom hulle dit nie kon doen nie (vers 19). Christus se antwoord was: “Maar hierdie geslag [tipe] gaan nie uit behalwe deur gebed en vas nie” (vers 21). Die dissipels het nie gevas voordat hulle probeer het om die duiwel uit te dryf nie. Indien hulle vooraf sou vas, sou God hulle die geloof gegee het wat hulle kortekom het (vers 20). Dink ’n bietjie hieroor: Die uiteindelijke vervulling van die Versoending behels dat die grootste bose gees ooit, uitgedryf word! Geen wonder dan dat God wil hê ons moet op hierdie dag vas om nader aan Hom te kom nie.

Uiteindelik, met Satan gebind en *vêr* verwyder en nie in staat om die mensdom verder seer te maak en te mislei nie, sal die mensdom leer om die ware God van die Bybel en Sy weë werklik te *waardeer* en om Hom met opregtheid *lief te hê* en *te aanbid*. Deur die bloed van Christus se offerande en die verwydering van die aartsvyand van beide God en mens, kan die versoening tussen God en mens finaal volbring word.

Stap 6

Die Huttefees

Nadat Satan verwyder is, wat sou die volgende stap in God se plan wees? Onmiddellik na die beskrywing van Satan se verbanning sê Openbaring 20: “Salig en heilig is hy wat deel het aan die eerste opstanding; oor hulle het die tweede dood geen mag nie, maar hulle sal priesters van God en van Christus wees en sal saam met Hom as konings regeer duisend jaar lank” (vers 6). Gedurende hierdie Millennium of 1,000-jaar periode, sal Christus as Koning van konings regeer oor hierdie planeet. Die heiliges of “geroepenes” – die ware Christene – sal konings en priesters wees saam met Hom (Op. 5:10; verwys 1 Kor. 6:2-3).

Dit is hierdie wonderlike tyd wat God se volgende Feestyd simboliseer! In Levitikus 23 beveel God die Israeliete om ’n Fees te hou, net vyf dae ná die Versoendag: “Op die vyftiende dag van hierdie sewende maand is dit sewe dae lank die huttefees vir die HERE ... Maar op die vyftiende dag van die sewende maand, as julle die opbrings van die land insamel, moet julle die fees van die HERE sewe dae lank vier ... En op die eerste dag moet julle vir julle vrugte neem van sierlike bome, met palmtakke en takke van digte bome en rivierwilgers, en sewe dae lank voor die aangesig van die HERE julle God vrolik wees. En julle moet dit as fees van die HERE sewe dae in die jaar vier. Dit is ’n ewige insetting vir julle geslagte. In die sewende maand moet julle dit vier. Sewe dae lank moet julle in hutte woon; almal wat in Israel gebore is, moet in hutte woon” (verse 34-42).

Die Huttefees was dus ’n tyd van feesviering en vrolikheid ná die vrugte- en groente-oeste ingesamel is. Dit moes *sewe dae* duur – op sigself verteenwoordigend van ’n volledige tydperk. Net soos die wekelijkse Sabbat, beeld dit die sewende millennium in mensegeskiedenis uit – die Millennium van Christus se Regering. Dit is die Fees van Tabernakels of die Huttefees genoem omdat ou Israel sewe dae lank in hutte, tente of ander tydelike huisvesting moes woon.

Wat kan ons uit hierdie Feestyd leer?

'n Wêreld gevul met vreugde

Deuteronomium bevat ook instruksies oor hierdie Feestyd: “Die Huttefees moet jy sewe dae lank hou as jy van jou dorsvloer en jou wynpers insameling hou. En jy moet vrolik wees op jou fees, jy en jou seun en jou dogter en jou slaaf en jou slavin en die Leviet en die vreemdeling en die wees en die weduwee wat in jou poorte is. Sewe dae lank moet jy vir die HERE jou God fees hou op die plek wat die HERE sal uitkies; want die HERE jou God sal jou seën in al jou inkomste en in al die werk van jou hande; en jy moet net maar vrolik wees” (Deut. 16:13-15).

'n Sleutelement van die Huttefees is dus *vreugde*, want daar is baie waaroor ons vreugde sal hê! Die Bybel beskryf die tyd wat gesimboliseer word deur hierdie Fees: “En aan die einde van die dae sal die berg van die huis van die HERE vas staan op die top van die berge en verhewe wees bo die heuwels, en al die nasies sal daarheen toestroom. En baie volke sal heengaan en sê: Kom laat ons optrek na die berg van die HERE, na die huis van die God van Jakob, dat Hy ons sy weë kan leer en ons in sy paaie kan wandel. Want uit Sion sal die wet uitgaan en die woord van die HERE uit Jerusalem. En Hy sal oordeel tussen die nasies en regspreek oor baie volke; en hulle sal van hul swaarde pikke smee en van hul spiese snoeimesse; nie meer sal nasie teen nasie die swaard ophef nie, en hulle sal nie meer leer om oorlog te voer nie” (Jes. 2:2-4).

Ja, met Christus se terugkeer sal die sluier van “blindheid” oor die mensdom gelig word. Mense met 'n nederige en ontvanklike gesindheid sal die wêreld vol wees, met Christus en Sy verheerlikte heiliges wat hulle leer en regeer en vrede en harmonie sal seëvier. Soos ons gesien het, sal die aarde “vol wees van die kennis van die HERE” en die mensdom sal nie meer “kwaad doen of verderf aanrig op my hele heilige berg nie” (Jes. 11:9). Daar sal *vreugde* wees soos die wêreld nog nooit beleef het nie: “Dáár sal geen leeu wees nie, en geen verskeurende dier sal daarop kom of daar aangetref word nie; maar die verlostes sal daarop wandel; en die losgekooptes van die HERE sal teruggaan en na Sion kom met gejebel, en ewige vreugde sal op hulle hoof wees; vreugde en blydschap sal hulle verkry, maar kommer en gesug vlug weg” (Jes. 35:9-10).

Wanneer die moderne Israëliete terugkeer uit hulle gevangenskap in die eindtyd, sal hulle “die ou puinhoop bou, die verwoeste plekke uit vroeër dae weer oprig en die verwoeste stede

weer nuut maak wat woes was van geslag tot geslag ... In plaas van julle skande *ontvang julle* 'n dubbele deel; en in plaas van die smaad sal hulle jubel oor hul deel. Daarom sal hulle in hul land 'n dubbele deel in besit neem, ewige vreugde geniet" (Jes. 61:4, 7). Die profeet Miga voeg by: "Maar hulle sal sit elkeen onder sy wingerdstok en onder sy vyeboom, sonder dat iemand hulle verskrik" (Miga 4:4). Trouens, daar sal geen armoede meer wees nie, geen haweloosheid nie. Oorvloed vir almal. Dit sal 'n tyd wees wanneer God vir die hele wêreld 'n "maaltyd van vetspyse" berei (Jes. 25:6).

Die geïnspireerde apostel Petrus noem dit "die tye van die wederoprigting van alle dinge, waarvan God van ouds af gespreek het deur die mond van al sy heilige profete" (Hand. 3:21). Daar is werklik tientalle profesieë dwarsdeur die Ou en die Nuwe Testament wat praat van dié tyd van Christus se Wederkoms, van die *hele* wêreld wat begin verstaan en van ware vrede en veiligheid wat die aarde oorspoel omdat die mensdom dan God se regverdige *Wette* leer en Sy hele *lewenswyse* uitleef. Dis 'n "herstelling", want Satan se eeue lange terreur sal verby wees en God se Regering sal einde ten laaste op aarde 'n werklikheid wees. Dit was die totale boodskap wat Jesus gepreek het gedurende Sy eerste koms. (Vra gerus ons gratis boekie, *Glo u die ware Evangelie?*)

Die groot laatoes

Onthou, ons lees in Exodus 23 van die "fees van die insameling aan die einde van die jaar as jy jou werk uit die land insamel" (vers 16). Uit die gedeelte oor die Pinkster, weet ons dié Fees simboliseer die groot oes in die herfs in Israel. Vir Christene simboliseer dit die groot *geestelike* oes van mense wat ingesamel word tydens die 1,000-jarige Regering van Christus!

U sien, onder die Regering van God se Koninkryk sal verlossing beskikbaar wees vir alle mense. Dit sal nie net 'n *paar* wees wat die kans sal kry om gered te word nie. *Almal* sal dan geroep word! God sê oor dié tyd: "En daarna sal Ek my Gees uitgiet op alle vlees" (Joël 2:28). Alhoewel die vervulling hiervan *begin* het met die stigting van die Nuwe-Testamentiese Kerk (Hand. 2:14-21), sal dit *wêreldwyd* gebeur in die Wêreld van Môre, *wanneer elkeen wat dan leef* uiteindelik die weë van God sal leer en die kans sal kry om, *sonder Sataniëse misleiding*, God te dien en Hom te gehoorsaam.

Die Heilige Dae – God se Meesterplan

Die duisendjarige Regering van Christus is gewis die tyd waarvan die profeet Jeremia skryf: “Kyk, daar kom dae, spreek die HERE, dat Ek met die huis van Israel en die huis van Juda ’n nuwe verbond sal sluit; nie soos die verbond wat Ek met hulle vaders gesluit het op dié dag toe Ek hulle hand gegryp het om hulle uit Egipteland uit te lei nie – my verbond wat hulle verbreek het, alhoewel Ek gebieder oor hulle was, spreek die HERE. Maar dit is die verbond wat Ek ná dié dae met die huis van Israel sal sluit, spreek die HERE: Ek gee my wet [dieselfde Wet as vantevore] in hulle binneste en skrywe dit op hulle hart; en Ek sal vir hulle ’n God wees, en hulle sal vir My ’n volk wees” (Jer. 31:31-33).

Trouens, God se manjifieke geestelike Wet, die Tien Gebooue, is nog *nooit* ontbind nie! Die tien punte daarin is egter deur Jesus Christus “uitgebrei” en nog méér bindend gemaak, sodat ons nie bloot die letter van die Wet moet hou nie, maar ook die *geestelike bedoeling* daarvan. Daarom moet ware Christene hulle nie net weerhou om letterlik moord te pleeg nie, maar hulle moet hulself ook weerhou van vyandigheid en haat, wat die *gesindheid* van moord is (Matt. 5:21-22). Ons leer om onself nie alleen van letterlike owerspel te weerhou nie, maar ook om nie eens iemand in ons hart te begeer met wie ons nie getroud is nie (verse 27-28)!

Gedurende die Millennium sal God se Wette oor die hele wêreld op mense se harte en in hulle verstande geskryf word. Soos ons gesien het, beeld dié Wet eintlik God se *karakter* uit. Hy vereis dat ons hierdie karakter moet ontwikkel om vir ewig in Sy Koninkryk te kan leef!

Natuurlik is al die heilige Feestye van God ook bindend. Soos ons aan die begin van hierdie boekie gesien het, maak die Bybel dit *baie* duidelik dat *alle* nasies, onder die leiding van Jesus Christus, sal leer om die Huttefees te *onderhou* in die wonderlike Wêreld van Môre. Selfs die Egiptenare, wat moontlik eers gekant sal wees teen enigiets “Joods”, sal leer om die Fees te *onderhou* (Sag. 14:1-19) – sowel as die res van God se Feestye, **want al hierdie Feestye staan of val saam.**

Hierdie geestelike Feestye is vir die *hele* mensdom, met die uitsluitlike doel om ons die groot meesterplan van ons Skepper te leer. Indien mense, nasies en kerke die Feestye nié onderhou nie is hulle *blind* vir die doel wat God besig is om hier op aarde uit te werk. *Moenie wag* totdat Christus terugkeer en *almal gedwing* word om hierdie Feeste te hou nie. Word vandag ’n “pionier”. Leer om God

se Woord te *glo* en te *gehoorsaam* en reageer *nou* op Sy Waarheid. Christus sal dan wanneer Hy kom aan u sê: “Mooi so, goeie en getroue dienskneg, oor weinig was jy getrou, oor veel sal ek jou aanstel. Gaan in in die vreugde van jou heer” (Matt. 25:21).

Wat is die doel van tydelike blyplek gedurende die Huttefees? Vir die antieke Israëliete was dit gedeeltelik ’n herinnering dat hulle “reisigers” in die land was, dat hulle net tydelik daar sou bly. Geestelik gesproke, herinner dit Christene dat ons – net soos Abraham, ons vader in die geloof – ook “vreemdelinge en bywoners op aarde” is (Heb. 11:13), dat ons uitsien na daardie tyd wanneer die Koninkryk van God hier op aarde gevestig sal word.

Verder het ons van tyd tot tyd nodig om te onthou dat elkeen van ons in ’n tydelike “tentwoning” leef – ons stoflike liggaam. Paulus skryf: “Want ons weet dat as ons aardse tentwoning afgebreek word, ons ’n gebou het van God, ’n huis nie met hande gemaak nie, ewig, in die hemele. Want om hierdie rede sug ons ook en verlang om met ons woning uit die hemel oorklee te word ... Want ons wat nog in die tent is, sug en voel beswaard, omdat ons liever nie ontklee nie, maar oorklee wil word, sodat die sterflike deur die lewe verslind kan word” (2 Kor. 5:1-4).

Paulus verduidelik op ’n ander plek “dat vlees en bloed die koninkryk van God nie kan beërwe nie” (1 Kor. 15:50). Die enigste wesens wat dus werklik tydens die Millennium *in* die Koninkryk sal wees, is diegene wat verander is na geestelike wesens (vergelyk verse 45 en 49) – diegene wat gedoop is, die Heilige Gees ontvang het en tot die einde toe volhard het! Al die mense wat vlees-en-bloed wesens is aan die begin van die Millennium, sowel as die kinders wat gedurende die daaropvolgende duisend jaar gebore word, sal *steeds* in tydelike “tentwonings” wees – en wag op hulle beurt om God se Koninkryk in te gaan, net soos dit tans die geval is met bekeerde Christene.

Vandag gehoorsaam die lidmate van die Kerk van God steeds die opdrag om op spesifieke plekke byeen te kom vir die Feeste van God – al is dit nie meer nodig om in Jerusalem te vergader nie (verwys Joh. 4:19-21). Veral met die Huttefees is die plek van samekoms dikwels vër van ons tuistes en dan bly ons vir sewe dae in tydelike huisvesting, soos in hotelle of vakansiewoonstelle.

Laat ons verseker die Huttefees ONDERHOU net soos ons al die ander Feesafsprake met God onderhou. Laat ons fokus op die ontsagwekkende simboliek daarvan, want hierdie *glorieryke* tyd –

wanneer alle ware Christene hierdie wêreld sal onderrig, regeer en seën saam met Christus – is **binnekort** hier! Laat ons almal dan, in opregtheid, ons lewens **oorgee** aan God ons Vader en aan die *ware* Jesus Christus, sodat ons hierdie wonderlike roeping waardig mag wees.

Wat van die ander Joodse feeste?

Een van die bekendste Joodse heilige dae is die winterfees van *Hanukkah*. Dit is nie een van die feestye wat die Here in Levitikus 23 gee nie. Moet ons dié dag herdenk en ook die ander Joodse heilige dae soos Purim en sekere vasdae?

Sommige mense dink dat ons geen ander dae mag vier nie omdat God sê om niks by te voeg by die Wette wat Hy in die Bybel gee nie (Deut. 12:32). In konteks gesien, is dit egter duidelik dat God teen *heidense gebruike* is wat veronderstel is om Hom te vereer, soos Kersfees en Paasfees of “*Easter*” (verse 29-32).

Verder is daar etlike Bybelse voorbeelde waar nasionale leiers sekere dae opsygesit het as nasionale dae vir gewyde diens en viering voor God. Salomo het dit gedoen met die inwyding van die Tempel (1 Kon. 8:62-66). Onder die koningskap van Hiskia het die mense die Fees van Ongesuurde Brood vir ’n verdere sewe dae gehou (2 Kron. 30:21-27). God het dit nie beveel nie, maar was verheug daaroor.

Eeue later, in die boek van Ester, lees ons hoe dat God die Jode dwarsdeur die Persiese Ryk verlos het toe ’n komplot gesmee is om hulle uit te wis. Die Jode stel toe Purim in om hierdie wonderbaarlike verlossing te herdenk. Later stel hulle *Hanukkah* in [die Fees van Ligte of Tempelwyding]. Net soos Purim, het hierdie winterfees ook nié sy oorsprong in heidense godsdiens nie. Inteendeel, hierdie fees herdenk agt dae lank die heiliging van die tweede tempel (165 v.C.), nadat dit besoedel is deur die Siriese invaller Antiochus Epiphanes. Volgens tradisie was daar net genoeg olie oor om die Tempel Menora vir *een* dag te laat brand, maar dit het wonderbaarlik aanhou brand vir agt dae! Daarom dat die fees agt dae duur.

Selfs Jesus Christus het hierdie Fees van Tempelwyding bygewoon (Joh. 10:22-23). Daar is sekerlik niks verkeerd om die

Tempel se inwyding te vier nie en om God op daardie spesifieke herdenkingsdag te dank nie. Trouens, Christus se perfekte voorbeeld wys hier baie duidelik dat dit reg is om deel te neem aan 'n nasionale godsdienstige fees of vakansiedag wat vir 'n eerbare doel ingestel is, solank daar geen heidense gewoontes en vals godsdienstige idees aan verbonde is nie. So, byvoorbeeld, kan die Amerikaanse viering van “*Thanksgiving*” beslis gebruik word om God te vereer.

Natuurlik sal die viering van Joodse feeste soos *Hanukkah* of Purim min betekenis hê vir *nie*-Jode. Daarom word daar nie van *nie*-Jode verwag word om sodanige feeste te vier nie. So sal “*Thanksgiving*” nie betekenis hê vir *nie*-Amerikaners nie en so sal Geloftedag nie betekenis hê vir *nie*-Afrikaners nie.

Stap 7

Die Laaste Groot Dag

Nadat ons die Pinksterfees ondersoek het, het ons gesien dat die oorweldigende meerderheid van hoofstroom Christendom glo dat vandag die enigste dag van verlossing is. Volgens hierdie kerke is God nou in 'n groot “sielreddingstryd” gewikkel met Satan. Ons behoort teen hierdie tyd te weet dat sodanige leerstelling vals is. Die volgende verse gee net weer 'n kort oorsig van hierdie grondbeginsel.

Eerstens, onthou dat die Bybel sê “Die Here verdraag nie die belofte soos sommige dit verdragings ag nie, maar Hy is lankmoedig oor ons en wil nie hê dat sommige moet vergaan nie, maar dat almal tot bekering moet kom” (2 Pet. 3:9). Let ook daarop dat Paulus praat van “God, ons Verlosser, wat wil hê dat alle mense gered word en tot kennis van die waarheid kom” (1 Tim. 2:3-4). God se geïnspireerde Woord sê ook dat Hy geen “aannemer van die persoon is nie” (Hand. 10:34; Rom. 2:11). Met ander woorde, God trek niemand voor nie. Hy het almal in die wêreld lief (Joh. 3:16) en wil aan almal wat ooit geleef het, die geleentheid gun om gered te word!

Wat van diegene wat in heidense kulture geleef en gesterf het en nooit eens van Jesus Christus gehoor het nie? Dink daaraan dat die Seun van God onomwonde sê: “VOORWAAR, voorwaar Ek sê vir julle, wie nie by die deur in die skaapstal ingaan nie, maar van 'n ander kant af inklim, hy is 'n dief en 'n rower ... Voorwaar, voorwaar Ek sê vir julle, Ek is die deur van die skape” (Joh. 10:1, 7). Die apostel Petrus is geïnspireer om van Christus te sê: “En die saligheid is in niemand anders nie, want daar is ook geen ander naam onder die hemel wat onder die mense gegee is, waardeur ons gered moet word nie” (Hand. 4:12). U neem dus vir Jesus aan – die *ware* Christus van die Bybel – of u verwerp Hom. Indien u Hom verwerp, is u NIE 'n Christen nie. Dit is so eenvoudig.

Soos ons reeds vasgestel het, is omtrent *almal blind* vir die waarheid oor die werklike God en die werklike Christus. Die feit is dat die oorgrote meerderheid van die mensdom deur die eeue heen nog nooit aan *enige* vorm van Christelikheid blootgestel is nie – dit is vandag steeds die geval! Daarbenewens weet die meeste Christene in naam nie waaroor *ware* Christelikheid gaan nie, want hulle het 'n wesentlike *vals* godsdiens aanvaar.

Om nou sommer reguit te praat: Elke regdenkende mens behoort tog te begryp – indien hy oor die saak nadink – dat *miljoene* mense in menseheugenis wat Christelikheid bely het egter nooit ware Christene was nie! Die meeste van hulle het nooit eens *enige* vorm van diepe berou ondervind nie, ook nie ’n ware aanvaarding van Jesus Christus as hulle Redder nie en ook nie *enige* werklike *draaipunt* in hulle lewenstyl of denkwyse aangebring nie. Met ander woorde, daar was *geen* aanduiding dat hulle ooit God se Heilige Gees ontvang het en ’n geestelike “ommeswaai” gemaak het nie. Die apostel Paulus skryf immers: “Maar as iemand die Gees van Christus nie het nie, dié behoort nie aan Hom nie” (Rom. 8:9). Indien u nie aan *Christus behoort* nie, is u nie ’n *Christen* nie – en kan u *nie* gered word nie!

Ons sit steeds met ’n probleem: Wat van al daardie mense wat geleef en gesterf het sonder dat hulle ooit God se waarheid geleer is? Is hulle vir ewig verlore? Kon die Almagtige nie seker maak dat hulle die waarheid sou leer ken en hulle ’n regverdige kans gee om gered te word nie? Wat is die *werklike antwoord* op hierdie dilemma?

Die Agtste Dag

Kom ons bekyk nou die laaste Heilige Dag in God se meesterplan van nader. Onthou, die Huttefees was slegs ’n Fees van sewe dae – sewe simboliseer voltooiing – dus, voltooiing van die hele Millennium. Let egter op God se opdrag in Levítikus 23 aangaande dié Fees: “Op die vyftiende dag van hierdie sewende maand is dit sewe dae lank die huttefees vir die HERE. Op die eerste dag moet daar ’n heilige vierdag wees; géén beroepswerk mag julle doen nie. Sewe dae lank moet julle aan die HERE ’n vuuroffer bring. Op die agtste dag moet daar vir julle ’n heilige vierdag wees ... julle mag geen beroepswerk doen nie ... op die eerste dag is dit rusdag, en op die agtste dag is dit rusdag” (Lev. 23:34-39).

Dié “Agtste Dag” volg op die sewe dae van die Huttefees en is in werklikheid ’n *aparte* Fees. Dit is egter onlosmaaklik *gekoppel* aan die Huttefees en word in ’n sekere sin as deel daarvan gereken. Dit is hoekom Johannes daarna verwys as “die laaste dag, die groot dag van die fees” (Joh. 7:37) en vandaar ons hedendaagse verwysing daarna as die Laaste Groot Dag.

Die Heilige Dae – God se Meesterplan

Wat sou hierdie Heilige Dag dan simboliseer? Omdat dit onmiddellik volg op die Huttefees kan ons aflei dat dit te doen het met die gebeure wat volg op die Millennium. Aangesien dit gekoppel is aan die Huttefees, kan ons dus verwag dat dit 'n voortsetting is van waaroor die Millennium gaan en dit is werklik die geval.

Kom ons ondersoek Johannes se beskrywing van dié Fees: “En op die laaste dag, die groot dag van die fees, het Jesus gestaan en uitgeroep en gesê: As iemand dors het, laat hom na My toe kom en drink! Hy wat in My glo, soos die Skrif sê: strome van lewende water sal uit sy binneste vloei” (Joh. 7:37-38). Hierdie stelling is waarskynlik gemaak na aanleiding van 'n seremonie wat daaglik gedurende die Huttefees plaasgevind het. Water uit die put van Siloam is saam met wyn uitgegooi oor 'n *sukka* of tent, wat bo-op die altaar in die Tempel gebou is. Hierdie seremonie is die “Huis van Waterstorting” genoem en tydens die seremonie het die mense die woorde van Jesaja 12:3 gesing: “En julle sal water skep met vreugde uit die fonteine van heil.” Dit was moontlik net ná hierdie seremonie op die sewende dag, teen sonder en aan die begin van die Agtste Dag, dat Jesus bogenoemde woorde geuiter het.

Wat het Hy dan bedoel met “strome van lewende water?” Die apostel Johannes verskaf die antwoord in die volgende vers: “En dit het Hy gesê van die Gees wat dié sou ontvang wat in Hom glo” (Joh. 7:39). Soos ons ook gesien het, God het reeds begin om Sy Gees “op alle vlees” (Joël 2:28) uit te stort, beginnende met die uitverkorenes vanaf die stigting van die Nuwe-Testamentiese Kerk. Ons het ook gesien dat dié proses sal voortgaan en uitbrei tot 'n selfs groter vervulling in die Millennium. Kan dit wees dat 'n nóg groter vervulling ná die Millennium kom? Steek daar meer in die “groot laatoes” as net diegene wat reageer op God se roeping gedurende daardie 1,000-jaar periode?

Kom ons kyk nou wat gebeur dan ná die Millennium. Openbaring 20:4-5 verwys na die opstanding van God se ware heiliges aan die begin van die 1,000 jaar as die “eerste opstanding”. Vanselfsprekend moet daar minstens nog 'n *ander* opstanding volg, nie waar nie? Dit is trouens presies wat vers 5 sê: “En die ander dode het nie herlewe totdat die duisend jaar voleindig was nie.” Daar het u dit! Dié is 'n opstanding van die *res* van die mensdom, van diegene wat nooit tevore die kans gehad het om gered te word nie.

Wat gebeur dan met hulle? In verse 3 en 7-10, beskryf Johannes hoe Satan – wat vir ’n duisend jaar gebind was – aan die einde van die Millennium vir “’n kort tydjie” losgelaat word as ’n toets vir die mensdom en dan vir ewig uit die prentjie verwyder word. Johannes beskryf sy visioen van die oordeelstyd van daardie mense wat dan uit die dood opgewek word. Hy skryf: “EN ek het ’n groot wit troon gesien en Hom wat daarop sit, voor wie se aangesig die aarde en die hemel weggevlug het; en daar is geen plek vir hulle gevind nie. En ek het die dode, klein en groot, voor God sien staan, en die boeke is geopen; en ’n ander boek, die boek van die lewe, is geopen. En die dode is geoordeel na wat in die boeke geskryf is, volgens hulle werke” (Op. 20:11-12).

Die “boeke” wat hier genoem word, is ongetwyfeld die boeke van die Bybel wat, soos met alle ware geestelike begrip, tot dusver vir die hele mensdom geslote was (verwys Mark. 4:11-12). Die Griekse term *biblia*, hier as “boeke” vertaal, is ook die oorsprong van ons woord “Bybel”. Vir die *eerste keer* sal hierdie mense se verstande en harte tot die Skrif geopen word.

Aangesien die “boek van die lewe” – die lys van name van diegene wat die ewige lewe sal beërwe – *ook* geopen word, is dit duidelik dat die weg tot redding op dié stadium nog beskikbaar is. Dit beteken dus dat hierdie mense wat ’n nuwe, stoflike lewe gegee word ná die Millennium, uiteindelik hulle kans sal hê om gered te word. Let mooi op: Dit is hoegenaamd nie ’n *tweede kans* nie – dié kans word gegee aan diegene wat nooit tevore ’n kans gehad het nie! Dit is tydens hierdie “Groot Wit Troon Oordeel” dat hulle vir die eerste keer werklik geroep word vir hulle *eerste* kans – hulle *eerste en enigste* kans – tot redding. Met Satan vir ewig uit die pad, sal hulle verstand dan vir die eerste keer geopen word tot *ware begrip*.

Die Oordeelsdag

Party mense verstaan dat “oordeel” in hierdie geval veroordeling, verdoeming of die vel van ’n vonnis beteken. Dit is nie wat hier bedoel word nie. Die bedoeling is dieselfde as in 1 Petrus 4:17: “Want die tyd is daar dat die oordeel moet begin by die huis van God.” Dit beteken dat ons wat tans in die Kerk van God is, gedurende hierdie tyd geoordeel sal word volgens ons dae. Dié oordeelsperiode duur ons hele leeftyd lank. Net so sal daar in die

Die Heilige Dae – God se Meesterplan

Groot Wit Troon Oordeel vir almal wat in onkunde geleef en gesterf het 'n leeftyd van geleenthede wees om tot bekering te kom, om die Heilige Gees van God te ontvang en goddelike karakter te ontwikkel.

Let op wat Christus sê aan die stede van Sy tyd wat Hom en Sy leerstellings verwerp het: “Wee jou, Górasin, wee jou, Betsáida! want as in Tirus en Sidon [heidense Feniciëse stede] die kragtige daade plaasgevind het wat in julle plaasgevind het, sou hulle hul lankal in sak en as bekeer het. Maar Ek sê vir julle, dit sal vir Tirus en Sidon verdraagliker wees in die oordeelsdag as vir julle” (Matt. 11:21-22).

Die inwoners van hierdie heidense stede wat *nog nooit* van Christus gehoor het nie, sal dit makliker vind om by God se lewenswyse aan te pas en om verkeerde waardes en begrippe af te leer in die toekomstige oordeelstyd. Selfs Sodom, 'n stad wat sinoniem is met boosheid, word in hierdie kategorie ingesluit: “En jy, Kapérnaüm ... want as in Sodom die kragtige daade plaasgevind het wat in jou plaasgevind het, sou hy bly staan het tot vandag toe. Maar Ek sê vir julle dat dit vir die land van Sodom verdraagliker sal wees in die oordeelsdag as vir jou” (verse 23-24).

Hier word beslis nie na vonnisse verwys nie. Hoekom nie? “Want die loon van die sonde is die dood” (Rom. 6:23). Watter verskil sal dit dan maak om slegs een groep sondaars te straf en nie 'n ander groep nie? Dood is dood! Nee, as God hierdie mense oordeel *volgens dieselfde standaard* as ander – die Bybel sê uitdruklik dat God almal oor dieselfde kam skeer – dan sou die ou heidene *geen kans staan* op die ewige lewe nie, omdat hulle Jesus Christus *nie* as Saligmaker aangeneem of God se weë gehoorsaam het nie. Weereens, die *enigste* antwoord is dat hulle – in 'n *toekomstige* oordeelstyd – die kans *sal* hê om God se plan werklik te verstaan, om Jesus Christus aan te neem as hulle Heer en Verlosser en dat hulle *dan* geoordeel sal word volgens hulle optrede in *hulle eerste geleentheid* tot redding.

Dink 'n bietjie hieroor na. Hoe kan 'n regverdigde en redelike God anders optree – veral in die lig van Christus se stelling dat hierdie heidene in die verre verlede hulle *sou* bekeer het AS hulle kon sien wat hulle nodig gehad het om te sien? Soos Abraham gevra het: “Sal die Regter van die ganse aarde geen reg doen nie?” (Gen. 18:25). Die antwoord is dat God, wat nooit partydig is nie, *altyd* reg sal laat geskied. Daarom sal Hy elkeen 'n *werklike* kans tot bekering gun.

Ons kan nou wel vra waarom dit vir heidense nasies makliker sal wees in die Groot Wit Troon Oordeel as vir diegene wat in die tyd van Christus in Judea geleef het. Die antwoord is dat die heidense nasies *geen* geestelike kennis gehad het nie, terwyl die Jode van daardie tyd *beter gewees het* – want hulle is van kindsbeen af uit die Woord van God geleer! Selfs dit is relatief, want die mense in Christus se tyd was *ook* blind vir die waarheid van God, maar tot ’n mindere mate (verwys Matt. 13:10-11).

Wanneer ons dus kyk na die mense om ons wat nie nou bevoorreg is om die wonderlike Waarheid te verstaan wat God aan ons gegee het nie, moet ons besef dat ontelbare miljoene ongelowiges uit die verlede en die hede vurig sal vasklou aan die Waarheid wanneer hulle dit ten volle verstaan. Hulle mag beter Christene word – beter diensknegte van God – as baie van ons aan wie die kosbare Waarheid tans gegee is. Hulle sal, indien ons die Waarheid as vanselfsprekend aanvaar en nie so geesdriftig daaroor is soos ons behoort te wees nie! Verder moet ons nooit dink dat wat ons genadige God vir ons gedoen het, ons enigszins beter maak as die res van die mensdom nie.

Dit is eintlik ’n kwessie van *tydsberekening*, want, op die tyd wat *God* beplan, sal alle mense wat ooit geleef het, ware begrip van Sy meesterplan en doel ontvang – en die oorgrote meerderheid sal die Waarheid *aanvaar* wanneer hulle oë oopgemaak word.

Lewende Water

In Eségiël 37 beskryf God ’n laagte van dor bene (verse 1-4) – die oorblyfsels van mense wat lank gelede al dood is. Aan hierdie bene sê Hy: “Kyk, Ek bring gees in julle in, sodat julle lewendig kan word. En Ek sal senings op julle lê en vlees oor julle laat opkom en ’n vel oor julle trek en gees in julle gee, sodat julle lewendig kan word; en julle sal weet dat Ek die HERE is” (verse 5-6). Hier is mense wat *uit die dood opgewek* is en weer *fisiese* lewe gegee is – dis anders as met die “eerste opstanding” waar die heiliges verander na ewige *geestelike* lewe (verwys 1 Kor. 15:35-50). Die dor bene wat opgewek word, word geroep om die Here te “ken”, om die ware God en Sy plan te leer ken.

Wie is hierdie mense wat die “ontslaglike groot leër” uitmaak? God sê aan die profeet Eségiël: “Mensekind, hierdie bene is die hele

Die Heilige Dae – God se Meesterplan

huis van Israel. Kyk, hulle sê: Ons bene is verdor, en ons verwagting is verlore; dit is klaar met ons!” (Eseg. 37:11). God laat die dor bene figuurlik hierdie woorde sê om hulle klaarblyklik hopelose toestand te beskryf – hopeloos weens hulle dwaling, hulle eiesinnige lewenswyse en duisende jare in die graf. Behalwe vir die handjievul profete, was die meeste Israëliete van die verlede totaal en al vleeslik en het *geen benul gehad* van die werklike plan van die Almagtige God nie.

Ons genadige God sê egter: “Kyk, Ek sal julle grafte oopmaak en julle uit jul grafte laat opkom, o my volk! En Ek sal julle bring in die land van Israel ... En Ek sal my Gees in julle gee, dat julle lewendig kan word; en Ek sal julle vestig in jul land” (verse 12-14).

Hoe duidelik!

Hier is mense wat nooit die Heilige Gees ontvang het nie – dus van God afgesny was (verwys Rom. 8:9). Nou word die Heilige Gees aan hulle gegee nadat hulle uit die dood opgewek is tot ’n fisiese bestaan. Ja, die Ewige God sal die ontelbare miljoene opwek wat geleef en gesterf het *lank voordat* Jesus gekom het en die volle betekenis van redding gebring het, asook diegene wat geleef het sedert Christus se eerste koms en wat eenvoudig net nie geroep is nie. Natuurlik weet ons dat dit nie net Israel insluit nie. Soos ons gesien het, wil God hê dat *elke* mens wat ooit geleef het, gered moet word.

Daarom moet elke individu die kans hê om *God se Heilige Gees* te ontvang, die “strome van lewende water” waarvan Christus gepraat het. Deur middel van die Heilige Gees word God se natuur en karakter, Goddelike liefde “in ons harte uitgestort” (Rom. 5:5) en daarvandaan vloei dit uit na ons medemens. Hierdie kosbare Gees sal gegee word aan diegene in die Laaste Oordeel, net soos dit vandag gegee word aan Christene, ná werklike bekering en doop. Hulle sal dan ook die geleentheid hê om *toe te neem* “in die genade en kennis van onse Here en Saligmaker, Jesus Christus” (2 Pet. 3:18). Al is hulle roeping op ’n *later stadium* as ons s’n – dit gaan gewis plaasvind!

U sien, die *waarheid* is dat God *nie* besig is om die wêreld *nou* te probeer red nie! Soos voorheen al gesê is, as die Grote God wat die heelal gemaak het die hele mensdom nou sou wou red, *sou Hy daarin geslaag het*. Die *biljoene* mense op elke kontinent sou almal spoedig goeie Christene geword het!

Een Skrifgedeelte wat deur die bank *verkeerd* toegepas en *verkeerd* verstaan word, is waar God deur Paulus sê: “In die tyd van die welbehae het Ek jou verhoor, en in die dag van heil het Ek jou gehelp. Kyk, nou is dit die tyd van die welbehae; kyk, nou is die dag van heil [verlossing]” (2 Kor. 6:2). Ongelukkig het verskeie Bybelvertalers verkeerdelik die bepaalde lidwoord “die” gebruik – “die dag van heil” – waar die oorspronklike Grieks die onbepaalde lidwoord “n” het. Paulus haal hier aan uit Jesaja 49:8, waar dit ook in Afrikaans foutief vertaal is. Die oorspronklike Engelse *King James* vertaling en die *New Revised Standard Version* gee dit korrek weer.

Die tyd wanneer God Sy Gees werklik op *alle* vlees sal uitstort, lê dus nog vêr in die toekoms. Elkeen wat ooit geleef het sal dan die kans hê om gered te word en om die ewige lewe te hê in die Koninkryk en Familie van God. Dit beteken egter nie dat elke mens uiteindelik God se lewenswyse sal kies nie. Sommige *sal* weier. Diegene wat God verwerp, sal in die poel van vuur gewerp word wanneer die hele aardoppervlakte sal brand en vergaan (Op. 20:14-15; 21:8; 2 Pet. 3:10). Selfs hierdie vernietiging is die liefde en genade van ons Skepper – want Hy wil nie hê dat mense moet voortlewe in die smart en ellende wat sonde en rebelseid noodwendig bring nie.

Daarna, nadat die aarde gesuiwer is deur vuur, sal daar ’n wonderskone “nuwe hemel en ’n nuwe aarde” wees (Op. 21:1). Die ewige stad van God, die nuwe Jerusalem, sal uit die hemel na die aarde neerdaal (vers 2). God die Vader, die Opperwese van die heelal, sal uiteindelik Sy tuiste hier by ons maak. Let op die verstommende woorde wat die apostel Johannes in sy visioen gehoor het: “Kyk, die tabernakel van God is by die mense, en Hy sal by hulle woon, en hulle sal sy volk wees; en God self sal by hulle wees as hulle God. En God sal al die tranes van hulle oë afvee, en daar sal geen dood meer wees nie; ook droefheid en geweene en moeite sal daar nie meer wees nie, want die eerste dinge het verbygegaan” (verse 3-4). Sonde en lyding sal verby wees en ons sal saam met God en Christus lewe deur die krag van die Heilige Gees – “’n suiwer rivier van die water van die lewe, helder soos kristal, wat uitstroom uit die troon van God en van die Lam” (Op. 22:1)

Met die Laaste Groot Dag, die sewende van God se vereiste Feestyte, eindig ons die uitbeelding van die *meesterplan* van ons

Die Heilige Dae – God se Meesterplan

Skepper. Vanaf ons aanvaarding van Christus as ons Verlosser, tot by Sy Wederkoms en verder tot by die Laaste Groot Dag, weerspieël hierdie Godgegewe, Godgeïnspireerde Feestye die *werklike* plan van God. Die *heidense* feesdae wat Satan aan 'n misleide mensdom afgesmeer het, is inderdaad goedkoop plaasvervangers, want in werklikheid beeld hulle 'n *vals* god en 'n *vals* Christus uit en lei dit tot die aanvaarding van 'n vals evangelie, wat lynreg in stryd is met die ware boodskap wat die *ware* Christus en Sy *ware* Apostels gepreek het.

Wanneer ons die wonderlike wysheid en genade van God insien en Sy ware plan van verlossing verstaan, kan ons heelhartig dié woorde van die apostel Paulus beaam: “o, DIEPTE van die rykdom en wysheid en kennis van God! Hoe ondeurgrondelik is sy oordele en onnaspeurlik sy weë!” (Rom. 11:33).

Gevolgtrekking

Volg God se plan

Wanneer die Lewende God besig is om u verstand te open om Sy Waarheid te verstaan, is u verantwoordelik *om op te tree* (Jak. 1:22; 4:17). Om u daarmee te help, het *Die Lewende Kerk van God* leraars en plaaslike gemeentes of videogroepe dwarsdeur die wêreld. Hulle kom gereeld bymekaar vir weeklikse eredienste op die Sabbat en op die jaarlikse Heilige Dae. *Die Lewende Kerk van God* publiseer hierdie boekie asook die *Wêreld van Môre*-tydskrif.

Indien u belangstel om hierdie dae saam met ons te onderhou, bel of skryf gerus aan ons. Die adres en telefoonnommer is agter in hierdie boekie. Wees verseker dat *niemand* u sal besoek of bel, behalwe as *u* daarom vra nie. Indien u dit sou verkies, kan een van ons verteenwoordigers 'n afspraak met u maak op 'n tyd en plek wat vir *u* geleë is. U sal NIE verplig word om by enige groep aan te sluit nie. Trouens, ons leraar of verteenwoordiger mag voorstel dat u eers meer lees en studeer op u eie en *seker maak* dat u werklik volgens elke woord van God wil leef.

Daarna, wanneer u sou besluit om dienste by te woon saam met God se mense en werklik Sy weeklikse en jaarlikse Sabbatte te onderhou, sal u dalk verbaas wees hoe versterk u geestelik voel. Om dienste by te woon, om God se Waarheid elke week te hoor en om die geleentheid te hê vir gesels met gelukkige, optimistiese mense wat dieselfde glo, sal waarlik 'n plesier wees.

In al hierdie dinge sal u 'n geestelike “pionier” wees. U sal aan u Skepper toon dat u gewillig is om *in geloof* Sy geïnspireerde Woord te gehoorsaam ten spyte van moontlike probleme en teenkanting. Sodoende sal u dan werklik besig wees om voor te berei vir die eerste opstanding, die “beter opstanding” (Heb. 11:35). Indien u vasstaan in hierdie nuwe lewenswyse, sal u uiteindelik Jesus Christus se bemoedigende woorde hoor: “Mooi so, goeie en getroue dienskneg, oor weinig was jy getrou, oor veel sal ek jou aanstel. Gaan in in die vreugde van jou heer” (Matt. 25:21).

Ons hoop om spoedig van u te verneem.

Plaaslike Kantore

VERENIGDE STATE VAN AMERIKA:

P.O.Box 3810

Charlotte, NC 28227-8010

Tel: +1 (704) 844-1970

<http://www.livingcog.org>

AUSTRALIË:

GPO Box 300

Claredon, SA 5157, Australia

Tel: +61 8 8383 6266

NIEU-SEELAND:

P.O. Box 2767

Shortland Street

Auckland 1140

Tel: 064 9-268 8985

FILIPPYNSE EILANDE:

P.O.Box 492

Araneta Center, Post Office

1135 Quezon City, Metro Manila

Tel: +63 2 8573 7594

SUID-AFRIKA:

Privaatsak X 3016, Harrismith, FS 9880

Republiek van Suid-Afrika

Tel: (058) 622-1424

<http://www.wvm.co.za>

KANADA:

P.O. Box 465

London, ON N96P 1R1

Tel: +1 (905) 814-1094

VERENIGDE KONINKRYK:

Box 111

43 Berkeley Square

London, W1J 5FJ

Tel/Faks: +44 844 800 9322

***Die Lewende Kerk van God* bied 'n
verskeidenheid van gratis literatuur aan wat 'n
Bybelstudiekursus, boekies en
die *Wêreld van Môre*-tydskrif insluit.**

**Die volgende boekies is geskryf met die doel om u te
help om God se doel met die wêreld en u lewe in die
besonder beter te verstaan.**

**Om u gratis literatuur aan te vra, verwys asseblief na
die vorige bladsy vir die adres in Suid-Afrika of verkry
u Afrikaanse literatuur via die Internet by
www.wvm.co.za**

Hervestig die oorspronklike Christenskap

Watter Dag is die Christelike Sabbat?

Wat is die doel van die lewe